



明詩綜卷八

小長蘆

朱彝尊

錄

海昌

馬思贊

緝評

高

啓 一百三十八首

啓字季迪長洲人洪武初召修元史授翰林院臺吹臺江館青丘南樓榭軒姑蘇雜詠等集自選為缶鳴集景泰中吳人徐庸彙為大全集

充云季迪詩雋逸清麗如秋空飛隼盤旋百折格之不下又如碧水芙蓉不假雕飾儵然塵外 謝玄鑿云季迪之詩緣情隨事因物賦形縱橫百出開闔變化其體製雅醇則冠裳委蛇佩玉而長裾也其思致清遠則秋空素鶴迴翔欲下而輕雲霽月之連娟也其文采縟麗如春花翹英蜀錦新濯其才氣俊逸如秦華秋隼之孤鶩崐崙八駿追風躡電而馳也 吳原博云季迪雄不敢當子美高不敢望晉魏然能變其格

明詩綜卷八

調足以彷彿韓柳王岑 劉欽謨云季迪詩多激烈慷慨雄偉奇古浩乎如大川之決防也鏘乎如洞庭之張樂也儵乎如幽壑之舞蛟也 李賓之云國初稱高陽張徐季迪才力聲調過三人遠甚百餘年來亦未見卓然有以過之者 陳約之云洪武初沿襲元體頗存纖詞特別季迪為之冠 徐子元云季迪傑峰雄秀瀚海涵海內詩宗豈惟吳下 楊用修云季迪一變元風首開大雅 王元美云季迪如射鵰兄伉健急利往來命中又如燕姬靚妝巧笑便辟 王敬美云季迪才情有餘使生弘正李何之間絕塵破的未知鹿死誰手楊張徐故是草味之雄勝國餘業不中與高作僕 穆敬甫云高詩奇抄來明可並唐之燕許 胡元瑞云國初稱高陽張徐季迪風華穎邁特過諸人同時若劉誠意之清新汪忠勤之開爽秦海史之峭拔皆自成一家逾相羽翼才具翻翻風骨穎利則遠過元人昭代初雅規禘禴 顧玄言云高侍郎始變元季之體首倡明初之音發端沈鬱入趣幽遠得風人激刺微旨足以嗣響盛唐 李時遠云季迪詩體麗而無粉澤清新而復高古優入盛唐 何元器云季迪矩矱全唐獨運胸臆近體不無中晚纖弱之調尚洽元季餘風 張氏開藩季迪修府治隱吳松江之青丘自號青丘子魏觀乎蘇為從居城中夏侯里觀改修府治季迪作上梁文連坐殿斬洪武七年事也 陳卧子云季迪詩如渥注生駒神駿可愛特未合和鸞之度耳 李舒章云季迪如春池黃鳥游目可念 宋棘文云季迪妙有才情翩翩矯逸明初詩人允宜首推 繆天自云季迪詩自古樂府文選玉臺金樓諸體下至李杜王孟高岑錢郎劉白辜

柳韓張以及蘇黃范陸虞揭靡所不有
之謂大家誦青丘子歌其自負亦不淺矣

靜志居詩話侍郎跌宕風華觀虎視造邪巨孽所不待言而何仲默
別推末景文第一試合諸體觀之來自非高敵也世傳侍郎賈禍因題
宮女圖其詩云奴扶醉踏蒼苔明月西園侍宴回小犬隔花空吠兒
夜深宮禁有誰來孝陵猜忌情或有之然集中又有題画犬詩云獨兒
初長尾茸茸行響金鈴細草中莫向瑤階吠人影羊車半夜出深宮此
則不類明初掖庭事二詩或是刺庚申君而作好事者因之傳會也

行路難

君不見盤中鯉暫失風濤登俎几君不見枝上蜩纔出
糞壤凌雲霄推移變化詎可測勿謂明日同今朝出乘
高車入大馬半是當年徒步者悠悠行路莫相欺為雌
為雄未可知

少年行

下直平明出禁門笑提博局伴王孫寶刀不敢將輸却

明詩綜卷八

二

明日沙場欲報恩

悲歌

征塗嶮巖人之馬飢富老不如貧少美游不如惡歸浮
雲隨風零落四野仰天悲歌泣數行下

李時遠云
不數漢魏

阿那瓌

牛羊草漫野大帳天山下十萬控弦兒聞箠齊上馬

吳明
卿云

健伉

野田行

白楊樹下誰家墳火燒野草碑無文路傍尚卧雙石馬
行人指是故將軍當時發卒開陰宅千里送葬城東陌
子孫今去野人來高處牧羊低種麥平生意氣安在哉

棘叢暮雨棠梨開百年富貴何足恃雍門之琴良可哀

秋風引

嗟爾秋風胡為來哉奏商律兮瑟颯而悲哀叩喬柯而
隕葉埽廣路以清埃入班姬之永巷過襄王之高臺瑤
琴自鳴羅幃齊開馬蕭蕭而嘶起鴻噉噉以翔迴使崩
雲駭浪震蕩於白日兮忽欲去而徘徊客有懷鄉失職
而對此者恨盈襟而難裁但欲變天地之搖落不知感
節序之摧頽秋風生歸去來

鍾廣漢云
善學太白

秋江曲送顧使君

秋江月滿秋潮大江上行人待潮過別離休說渡江難
半日順風船穩坐楚江茫茫葭蕩平使君來時雄雉鳴

明詩綜卷八

三

子弟從軍隔江去幾家猶住夕陽城水田雖荒飯常足
芡米夜春二十斛誰道蘇華不及前戶無征稅官無獄
渡江渡江君莫留江北樂似江南秋

鑿渠謠

鑿渠深一十尋鑿渠廣八十丈鑿渠未苦莫嗟吁黃河
曾開千丈餘君不見賈尚書

城虎詞

候潮門開啼早鴉有虎忽入居人家母兒畏竄雞犬伏
排籬突戶誰能遮獐風動樹初哮吼驚起東營捉生手
怒拔長戈試一春目光落地俛魂走南山藜藿深冥冥
白日橫行誰敢撓何為離窟來城市牙爪雖全不能恃

君不見壯士遭急縛失路窮時亦如此

春江行

春江南北疑無岸綠草綠波連不斷一女紅妝出浣紗
恰如鏡裏見桃花袂衣猶冷過寒食雲度春陰半江黑
浦口風多潮正深輕舟搖蕩愁人心鷓鴣暮啼歸路遠
飛絮茫茫楚王苑

廢宅行

鳴珂坊裏將軍第列戟齊收朱戶閉里媪逢人說舊時
有廬被奪廣園池今年沒入官為主散盡堂中義宅兒
廚煙久斷無梁肉羣鼠飢來入鄰屋官封未與別人居
日日閒苔雨添綠曲閣深沈接後房画屏生色暗無光
尋常不敢偷窺處守卒時來拾墜璫春風多少奇花樹
又有豪家移得去

牧牛詞

爾牛角彎環我牛尾秃速共拈短笛與長鞭南隴東岡
去相逐日斜草遠牛行遲牛勞牛飢惟我知牛上唱歌
牛下坐夜歸還向牛邊卧長年牧牛百不憂但恐輸租
賣我牛

養蠶詞

東家西家罷來往晴日深窗風雨響二眠蠶起食葉多
陌頭桑樹空枝柯新婦守箔女執筐頭髮不梳一月忙
三姑祭後今年好滿簇如雲繭成早檐前繅車急作絲

又是夏稅相催時

憶遠曲

楊子津頭風色起郎帆一開三百里江橋水柵多酒壚
女兒解歌山鷓鴣武昌西上巴陵道聞郎處處經過好
櫻桃熟時郎不歸客中誰爲縫春衣陌頭空問琵琶卜
欲歸不歸在郎足郎心重利輕風波在家日少行路多
妾今能使烏頭白不能使郎休作客

里巫行

里人有病不飲藥神君一來疫鬼却走迎老巫夜降神
白羊赤鯉縱橫陳男女殷勤案前拜家貧無穀神勿怪
老巫擊鼓舞且歌紙錢索索陰風多巫言汝壽當止此

明詩綜卷八

五

神念汝虔除汝死送神上馬巫出門家人登屋帝招魂

陸水修云如此章法入
之孫王樂府幾不能辨

主客行

主人楚歌客楚舞落日黃雲鴈聲苦笑拂腰間寶劍光
美人滿堂色如土大兒北海人中奇小兒能讀曹娥碑
相逢且莫歎貧賤但願有酒無別離君不見平原墓上
生秋草國士無窮道旁老

新絃曲

舊絃解新絃張水絲牽愁六尺長寬急頻從指邊聽金
鴈參差移不定新絃響高調易促不如舊絃彈已熟憐
新厭舊妾恨深爲君試奏白頭吟他日愁如舊絃棄泣

尚羅裙帶頭繫

竹枝歌

楓林樹樹有猿啼若箇聽來不慘悽
今夜郎舟宿何處
巴東不在定巴西

照田蠶詞

東村西村作除夕高炬千竿照田赤
老人笑祝小兒歌
願得宜蠶又宜麥明星影亂棲烏
驚火光辟寒春已生
夜深然罷歸白屋共說豐年真可卜

擬古二首

美人一相見遺我白玉環
上有雙雕龍遊戲在雲間
持此感深意佩結無時閒
玉以比貞潔環以明不絕雲龍
永相從誰能使離別

明詩綜卷八

六

黃鳥鳴春陽流芳滿西園攀條日已暮
悵惋不能言禦寒必重裘
涉道須雙轅離居非君子何以解憂煩
煩憂日已積佳期日已失
思君如蓬萊可望不可即
區區儻見察憔悴甘自畢

寓感六首

美女生貧家光豔人未識
遠聘入楚宮揚蛾欲傾國
朝游瓊臺上夕侍金輿側
奉歡擬千齡秋風失顏色
銜恩歸永巷貞意徒寂默
高高天上星墮作水底
石人事盡如斯推移歎何極

志士徇功業貪夫詫輕肥
亦有逃羣子矯矯與時違
彼

此更共笑不知誰是非達人體自然出處兩忘機浮雲
游天表舒卷有餘輝

攬轡登太行遙望洛北州峭函正西峙黃河復東流百
城無遺堵雲煙莽相繆朝作冠蓋場暮為狐兔丘昔人
爭此地干戈迭相讎當其得意時連陌擁鳴騶百年奄
忽盡魂魄空來游曷見采芝叟冥棲無所求

禠褐蹙華輅狐裘駕文車西門與北宮窮達一何殊彼
達矜已智此窮媿身愚東郭發至言兩惑各以祛厚薄
有定命巧拙果誰歟歸卧掩蓬室道存何所吁

頽陽在川上玄蟬夕鳴悲嫋嫋風起波翻翻葉辭枝曠
望天宇內沈寥此何時朱火已盈謝清商屆其期覽鏡

明詩卷八

七

忽自嗟綠鬢生素絲萬物有榮悴造化豈吾私

南山多浮雲北山有高樹因風暫來依風回復飛去兄
弟滿四海幾人此相遇握手交百懽分襟滋千慮蹤跡
不可常無為嗟去住

始發南門晚行道中

歲暮寒亦行征人有常期辭我家鄉樂適彼道路危酒
闌別賓親驅車出郊岐我馬力未痛已越山與陂回頭
望高城落日雲樹滋遭亂旣少安謀生復多飢塗逢往
來人孰不為此馳遠遊亦吾志去矣何勞悲

早過蕭山歷白鶴柯亭諸郵

客起何太早村荒絕雞鳴况時江雨晦不得見啓明凌

競度高關山空縣無城隔林聞人呼已有先我行側身
避徑滑聚足防厓傾衣寒復多風聒聒遠水聲千峰霧
中過不識狀與名嵐開見前郵始覺歷數程越禽啼楓
篁冷日傍午晴煙生沙墟寂葉落澗寺清登臨亦可悅
但恨時未平

聞長槍兵至出越城夜投龕山

列藩逼戎亂駐鉞實此州如何殺大將王師自相讎我
來亂始定城郭氣尚愁又聞有鄰兵倉卒豈敢留促還
出西門天寒絕行輶古戍暗雨雪旌旗暮悠悠野屋閉
不守澤田棄誰收居人且奔逃游子安得休逶迤蒼山
去泱泱玄雲浮入虎爭夜行風榛嘯巖幽我徒戒相親
一失未易求飢食谷口粟寒燒澗中樛神迷路多迂再
宿達海陬雖嘗登頓勞幸免迫辱憂聖尼畏於匡嗟我
敢有尤但慙去越早不遂名山游

夜抵江上候船至曉始行

夜辭西陵館霜谷叫猿歇津卒未具舟天險不可越漁
商雜候渡寒立沙上月蒼煙隱遙汀益覺潮漲闊開撓
散驚鳧海色曙初發曨曨前山來稍稍後嶺沒中流聞
鼓角隔岸見城闕客路得奇觀臨風悶俱豁

登鳳皇山尋故宮遺跡

兹山勢將飛宮殿壓其上江潮正東來朝夕似奔嚮當
時結構意欲敵汴都壯我來百年後紫氣愁不王烏啼

壁門空落葉滿陰障風悲度遺樂樹古羅巖仗行人悼
降王故老怨姦相蒼天何悠悠未得問興喪世運今復
衰淒涼一回望

宿湯氏江樓夜起觀潮

舟師夜驚呼隔浦亂燈集潮聲若萬騎怒奪海門入初
來聽猶遠忽過睇無及震搖高山動噴灑明月溼霜風
助翻江蛟龍苦難蟄應知陰陽氣來往此呼吸登樓覺
神壯憑險方迴立何處望靈旗煙中去波急

過奉口戰場

路迴荒山開如出古塞門驚沙四邊起寒日慘欲昏上
有飢鳶聲下有枯蓬根白骨橫馬前貴賤寧復論不知
將軍誰此地昔戰奔我欲問路人前行盡空村登高望
廢壘鬼結愁雲屯當時十萬師覆沒能幾存應有獨老
翁來此哭子孫年來未休兵彊弱事并吞功名竟誰成
殺人遍乾坤媿無極亂術佇立空傷魂

舟次敢山阻風累日登近岸荒岡僧舍

高岸鳴枯桑湖陰北風厲寒濤洶我前幾日不得濟孤
舟恐漂蕩石根暮牢繫憂來厭閒卧近寺聊獨詣雀飢
殘林空人倦危磴細年荒無居僧樹死石門閉神傷却
欲返微霰灑征袂窮冬已崢嶸故國尚迢遞仰看浮雲
馳東路阻歸計長歎復何言吾生信多滯

過破石

破石頗奇壯長河出連山絕壁兩岸開行舟過其間高
處誰解登陰藤裊難攀旁垂雨痕古仰露天光慳不知
真宰意隨地設險艱一夫據蜀閣二世憑秦關賴此非
要區爭奪得少閒徘徊佇望久日暮飛雲還

登海昌城樓望海

百川浩皆東元氣流不息混茫自太古於此見容德積
陰漲玄濤萬里失空色鴻鵠去不窮魚龍變莫測朝登
茲樓望動蕩豁胸臆始知滄溟大外絡九州域日出水
底宮煙生島中國寬疑浸天爛怒欲吹地是常時烈風
興海若不受職長堤此宵潰頻勞負薪塞况今艱危際
民苦在墊溺有地不可居瀕洞風塵黑安得擊水游圖

明詩綜卷八

十

南附鵬翼

秋懷 四首

明月出遠林流輝鑿牀幃促促草下蟲催我索故衣起
歎秋夜長欲取鳴琴揮掩抑不成弄中心復乖違有懷
難自宣勿謂知音稀

涼風動幽幔高堂夜空虛明燈無與語聊讀古人書古
人亦何人使我不得如棄卷輒還卧終宵自歎歎

朝游荒岡陞暮行空潭側我非楚大夫何有憔悴色良
辰思遠騁周道廣且直我馬力不前回駕仰偃息踟躕
阻脩竹日夕睇西北苟安非予志所懼時未識

弭權望江俟日落青楓林驚波駛且廣蕩漾浮雲陰靡

靡皋蘭衰鬢鬢渚鴻吟顧此凜節謝憂來忽傷心宋子
悲已多潘生歎彌深自古有此愁誰云獨吾今

出郊抵東屯

三首

故鄉一區田自我先人遺賴此養吾懶不耕坐待炊霜
露被寒野屬當斂穫時年來徵薄入稅駕宿東陂今年
雖未豐亦足療我飢萬鍾知難稱保此復何辭

邕邕雞登場秋稼恨狼籍疎榆蔭門巷景暗燈火夕田
家雖作苦於世寡憂戚况當收穫景斗酒復可適所以
沮溺徒躬耕不辭劇

坐久體不適卷書出柴關臨流偶西望正見秦餘山野
淨寒木疎川長暝禽還此中忽有得怡然散襟顏遂同

明詩綜卷八

十一

樵牧歸歌笑落日間

顧榮廟

有序

晉侍中顧彥先有墓并祠在長洲之東久而廢
為淫祀縣令周君復之為賦是詩

軍司吳國秀神機夙超朗弱冠游洛師已蒙南金賞崎
嶇諸王幕沈酒務遵養中罹廣陵艱計服匪誠枉風雲
一揮扇義旅臻同響事成恥言勳飄然理歸鞅晉社始
東遷羣賢悉收槩道謁真感會矯翼丹霄上德聞一代
稱跡泯千齡往時屯乏良佐英謨益堪想墳祠託荒郊
蕭條竝榛莽童童侵雨隧淫巫闖塵幌大夫過停轅式
瞻為含愴衣冠復故貌筵几陳新享寡劣忝鄉人因歌

表遐仰李舒章云似謝康樂

答張山人憲

聽君辛苦詞感我艱難情百年自有爲安用文章名雞鳴海光動車馬塵滿城相逢無新舊言合意自傾奉觴置君前長歌發哀聲時平苟未得飲此全其生

澄景閣夜宴

王孫喜留宴開閣望明河是夕月微暈涼風池上多棲禽翻暗叢駭魚動圓波清景厭絲竹雅詠荅高歌尊酌願勿間良宵易蹉跎預憂別在旦車馬層城阿

九日無酒步至西汀閒眺

高天無游氛秋氣自激肅離居時節變霜降未授服蕭條野田間晨步聊遠矚悠悠寒川駛靡靡晴巒矗菊叢有清香木葉無故綠親朋去我遠登高且連躅孤懷誰知音惆悵臨水曲名酒不可尋歸來掩茅屋

贈談鬼谷數瞽師金松隱

我聞鬼谷子乃是古仙真避世青谿中不汙戰國塵著書十三章當年授儀秦二子不善用竟皆殺其身瞽師得異傳相去逾千春不爲從衡說談數妙入神往年客南都蓬門集朱輪下簾論玄理驚動金陵人歸來隱虞山繞廬樹松筠誰言日無覩內照靈光新緬思大化根生此下土民起滅千萬塗孰能究其因或愚騁結駟或賢被懸鶉命也可奈何天道誰疎親世事昧守常毋使

徒紛紛

始遷西齋

乍懸南樓榻始布西齋筵西齋非吾廬幽淨亦可憐風
牖竹裊裊露庭菊鮮鮮圖史左右陳永日坐一氈婉孌
數童子哦誦當我前為爾竟寂寂低回欲窮年讀書將
何為乃與始志愆進無適時材退乏負郭田我生非匏
瓜謀食有道焉苟得隨羣趨顧此不稍賢飲餘解衣卧
毋嘲腹便便

題陳生画

前村夕陽明後嶺秋嵐積葉落露山村潮來沒江石遙
遙射鴈子慘慘聽猿客何事下征帆西陵渡頭驛

明詩綜卷八

七三

青丘道中

霖雨江暴溢奔流絕津涯茫茫野田白何由見春華居
人久已亡流萍滿其家昔我過此土極目桑與麻故道
不可尋舟行但蒹葭歲凶豈宜客四顧空長嗟

秋風

秋風屋外來落葉紛吾傷不出門幾日我樹如此黃但
覺成嬾性焉知逝顏光朝餐止一盃夕卧惟一牀仲尼
欲行道轍跡環四方而我何為者不與世相忘

大水

吾鄉水為國自昔稱漏天今年尤苦霖冒此上下田老
農愁相告無有二十年東江入門流比屋如敗船夜卧

牀屢移晨炊釜常懸涼風吹蒲稗羣鵝鳴我前茫茫失
川塗出行竟回遭斯民欲昏墊天意豈不憐陰陽致乖
沴孰能究其然歲饑尚勿憂甬勉當食鮮

毛公壇

欲觀漢壇符東上縹緲峰葛花墜寒露夕飲清心胷月
出太湖水鶴鳴空磻松真境久寂寥蒼苔闕靈蹤嘗聞
綠毛叟變化猶神龍世人豈得見偶許樵夫逢攀險力
易疲探玄志難從歸去白雲外空聞仙觀鐘

吳桓王墓

朝出南郭門高墳鬱蒼蒼借問葬者誰乃是長沙王黃
腸豈不錮盜發取所藏金環出世間封樹無輝光緬想
衰炎際當塗逞姦強英雄失所據虎視誰敢當王初奮
穉孤英風凜飛霜談笑定江東賢豪歎來翔少假須臾
年足見霸道昌何為困仇奴輕獵不自防天意豈佑魏
遽使斯人亡因觀感往事喟焉令人傷

虎丘次清遠道士詩韻

神仙不可羈乘螭躡雲漢豈將避羸劉荒山事窮竄何
年東觀海一至此峰翫悠悠清詩傳宵宵遺跡漫我來
繼登臨長嘯憤初岸旣秋煙蘿疎欲雨風竹亂夜深空
潭黑月吐石壁半龍驚汲僧來鳥喜游客散閣掩林下
夕鐘鳴巖中旦勝賞誰能窮今古付篇翰飛騰子何之
汨沒余可歎安得契真期超然豁靈贊

贈張主簿

離離平阜禾纂纂橫林藁客行愛樂土秋晚華亭道停
燭春紡遲鳴榜潭魚早借問何能然年來縣官好

龍門

龍門何崢嶸此地表奇蹟山分兩崖青天豁一罅白知
非禹功擊想是鬼手劈長爲風雨關開闔自朝夕深合
未吐雲對峙不崩石日光寒易傾苔色陰更積只宜過
此內便與人境隔始窺已幽深漸入尤險窄暗中把危
藤蜿蜒欲驚魄僧留看古刻敲火照絕壁晚聞松竹號
洶若波浪激不知神魚飛到此誰點額

天池

明詩綜卷八

十五

靈峰可度難昔聞枕中書天池在其巔每出青芙蓉湛
如玉女盆雲影含夕虛人靜時飲鹿水寒不生魚我來
屬始春石壁煙霞舒豔豔月出後冷冷雪消餘再汎知
神清一酌欣慮除何當逐流花遂造仙人居

劍池

千將欲飛出巖石裂蒼礦中間得深泉探測費修綆一
穴海通源雙崖樹交影山中多居僧終歲不飲井殺氣
凜猶在棲禽夜頻警月來照潭空雲起噓壁冷蒼龍已
化去遺我清絕境聽轉輾轡聲時來試新茗

練瀆

吳越水爲國行師利舟戰夫差開此河餘艘試新練十

萬凌潮兒材比飲飛健鼓擢激風濤揚舠逐雷電當時
意氣盈謂已無勾踐鷗避去沙洲龍愁閉淵殿恃強非
伯圖倏忽市朝變臺上失嬌姿泉間掩殘面至今西山
月恨浸秋一片猶有網魚人時時得沈箭

松江亭

泊舟登危亭江風墮輕幘空明入遠眺天水如不隔日
落震澤浦潮來松陵驛繇繇洲渚平莽莽葭菼積凭闌
不敢唾下有龍窟宅帆歸雲外秋鳥下煙中夕欲炊菰
米飯待月出海白喚起弄珠君閒吟第三笛

南峰寺

樵歸衆山昏天峰尚餘景欲投石門宿更度西南嶺遠
聞雲間鐘蘿逕入寺永懸燈照靜室一禮支公影鳥鳴
澗壑空泉響窗戶冷對此問山僧何如沃州境

楞伽寺

夕陽西下嶂返照東湖水來尋古寺遊楓葉秋幾里卽
門山後驚維馬林鳥起鐘聲出煙去半落漁舟裏楞伽
義未曉塵累方自恥欲打堦銘碑從僧乞山紙

支遁菴

閒登待月嶺遠叩棲雲關石室閉千載高僧猶未還殘
燈黃葉下古座青苔間不見跣趺影鶴鳴空此山

弔幽獨君

君本何代人姓名復為誰何年棄人間長眠此山睡荆

榛鬱蒙籠孤墳上無碑游魂久未化嗚咽還能詩人沒
乃歸滅憂樂豈復知君何獨煩冤猶有親愛思一死衆
所同已矣焉足悲陳辭為相弔此理君當推

剡原九曲二首

欲知溪流長百轉來越嶠舟行安能極嵐路入斜照清
景不足娛昔人豈辭詔石硯久難磨空林閒遺廟

入江水稍決霜降未可涉頻聞往來人出門即舟楫前
飛鷺鷺遠下飲垂猿健何處問興公風吹赤棠葉

早過南湖

湖黑月未出蒹葭露淒淒楊人識浦溆不畏荒煙迷殘
夢詎可續舟搖櫓聲齊開篷望天邊斗柄插水低津遙

明詩綜卷八

七

未見樹村近纔聞雞自嗟遠遊人中宵走東西不如沙
頭鴈宛頸猶安棲

春日言懷

芳樹何靡靡鳴禽亦嗒嗒時物豈不好人事誠多乖憂
來卧閒房語笑孰與偕天道諒不昧薄願終當諧惟應
守貞靜有酒陶中懷

題画鷹得嘯字

高風動古壁竦立見蒼鷄軒然欲飛揚嗟此粉墨妙秋
筋束老骨天寒勢逾矯腦枯草中兔氣盡櫪上驃健鷗
雖百餘凡材豈同調乾坤正肅殺怒氣號萬竅大野開
平蕪悲臺落殘照荒城有妖狐夜作猛虎嘯為君試一

擊壯士慙勇剽安能飽拳肉側翅隨年少

哭王隅

車行一輪摧鳥奮一翼傷人生失輔友誰當共提將相逢豈無人不獲如子良朝遊羣彥林夕棄萬鬼鄉春風吹南原百草萋以長呼君不歸魂割我欲斷腸豈不悟生滅情至諒難忘

送程校理遊江上

風亭裊離管草綠江水暮送此南浦人孤帆雨中渡別觴足自緩前驛花滿路春叢戀山鶯晚絮迷汀鷺我今獨愁居芳月誰與度佇立望遙波相思積煙霧

李舒章
云娟秀

至蓮村

明詩綜卷八

六

昔愛茲里幽誓將構蓬廬孰云墮世網重到十載餘喪亂喜獨完煙火霽舊墟柴門在深巷落日榆柳疎鄰翁念契闊攜筐饋雙魚苦問客何事顏色與昔殊焉知涉艱難多戚長少娛貧賤非所恥中情在閒居願翁勿相誚終當遂吾初

移家江上別城東故居

人情戀故鄉誰樂遠為客我行豈得已實為喪亂迫淒淒顧丘隴悄悄別親戚不去畏憂虞欲去念離隔雖有妻子從我恨終不釋出門未忍發惆悵至日夕

我昔

我昔在家日有樂不自知及茲出門遊始復思往時貧

賤為客難寢食不獲宜異鄉寡儔侶童僕相擁持天性
本至慵強使賦載馳發言恐有忤蹈足慮近危人生貴
安逸壯遊亦奚為何當謝斯役歸守東岡陂

京師嘗吳秬

新秬粲如玉遠漕來中吳初嘗愛精粳想出官田租我
本東臯民少年習耕鉏霜天萬穗熟恣啄從飢烏日暮
刈穫歸妻孥共懽呼茆屋夜春急風雨江村孤晨炊滿
家香薦以出網鱸如今幸蒙恩邀遊在南都門前半區
田別來想已蕪長年盜寸廩補報一事無投匕忽歎息
飽食慙農夫

送周四孝廉後酒醒夜聞鴈聲

明詩綜卷八

十九

別時酒忽醒客去唯空舍風雪鴈聲來寒生石城夜遙
憶渡江船正泊楓林下

唐昭宗賜錢武肅王鐵券歌

妖兒初下含元殿天子仍居少陽院諸藩從此擁連城
朝貢皆停事攻戰岐王一去梁王來長安宮闕生蒿萊
天目山前異人出金戈雙舉風煙開羅平惡鳥啼初起
犀弩三千射潮水歸來父老拜旌旗醜酒槌牛宴鄉里
擊裘駿馬驕春風錦袍玉帶真英雄詔書特賜誓終始
黃金鏤字旌殊功虎符龍節彤弓矢後嗣猶令赦三死
盡言恩寵冠當時天府丹書未逾此摩挲舊物四百年
古色滿面凝蒼煙天祐宰相署名在尋文再讀心茫然

古來保族須忠節受此幾人還覆滅王家勳業至今傳
不在區區一方鐵人生富貴知幾時泰山作礪徒相期
行人曾過表忠觀風雨斷蘚蕪殘碑

送王太守遷雲間

男屠豬羊女醜酒共禱神祠留太守太守今年遷大州
除書已下誰能留兩州相去無百里失君應愁得君喜
安得如君數十人一時盡福東南民

劉松年画

樵青刺篙勝搖檣船頭分流水聲響青山渺渺波漾漾
白鷗飛過時一兩載書百卷酒十壺日斜出游女兒湖
鄰舟買得巨口鱸醉拍銅斗歌鳴嗚此樂除却江南無

送葉卿東還

聞君辭家今幾年布衣綫斷芒屨穿江湖夢迴燈火夜
聽雨每憶山中田兵戈忽斷故鄉路雖有兩足歸無緣
上書願雪父兄恥畫地聚米籌山川居然無成困逆旅
白日但看孤雲眠時人不容禰生傲坐客豈信毛公賢
黃金已盡酒徒散壯士反爲兒女憐飢吟倚壁氣未餒
有似病鶻棲荒煙却欲南遊探禹穴僕夫整駕雞鳴前
波濤翻江畏飢鰐霧雨連海愁飛鳶相逢誰肯問憔悴
山水自爲窮人妍乾坤無家去何止飄泊不異迴風船
區區願君自愛惜今古遇合無非天亂離貧賤何足歎
王孫亦在道路邊我今豈少四方志讀書坐破牀頭瓊

恩讎兩無欲誰報送子空歌寶劍篇

煮石山房爲金華山人賦

山人不飯秔稻香笑指白石爲餽糧金華之石猶可食
元是舊牧初平羊荆榛拾歸夜深煮自言久服能輕舉
但令隨處有雲根不問青天旱無雨我生無力耕西疇
硯田欲枯抱飢憂便當從君學此術絕勝乞米監河侯
夜發錢清

錢清渡頭船夜開黃茆苦竹聞猿哀客官醜酒水神廟
風雨滿江潮正來蒸飯炊魚坐篷底不覺舟行兩山裏
櫂歌早過越王城東方未白啼鴉起

獨遊雲巖寺寄周砥

明詩綜卷八

三

城西諸山非不奇我游獨與茲山宜紅櫻春開山後寺
白水夏滿山前陂幽居况與山不遠鐘鼓每到空齋帷
雨餘煙中落日下曳杖往讀頭陀碑兩崖蒼蒼日色古
枇杷樹高陰滿池殿燈欲昏上羣鼠墻鈴已靜蹲孤鷗
興來即遊興盡返迎送豈要山僧知困窮喪亂豈無感
正賴此境忘吾悲嗟君何爲乃自苦破屨短策塵中馳
挂帆能來亦未晚浦口三日南風吹

贈李外史

仙人飄飄若雲風來去倏忽誰能窮豈惟上界足官府
往往亦在塵埃中我欲尋真向五岳亂後舊路迷榛蓬
天雞未鳴夜谷暗海鶴已去秋壇空丹崖碧澗瑤草歇

洞府一闕無由通陌頭驚逢李道士自說柱史爲吾翁
倚人相傳解起死袖裏有丹如日紅我聞安期古策士
親見楚漢爭雌雄終然濁世不肯住渡海竟去先飛鴻
玄洲東望纔咫尺彩霞幻結金銀宮何當共赴食棗約
三花醉折春濛濛迴看城郭煙霧杳大笑下士真沙蟲

聽教坊舊妓郭芳卿弟子陳氏歌

時至正己亥歲作

文皇在御昇平日上苑宸遊駕頻出仗中樂部五千八
能唱新聲誰第一燕國佳人號順時姿容歌舞總能奇
中官奉旨時宣喚立馬門前催画省建章宮裏長生殿
芍藥初開勅張宴龍笙奏罷鳳絃停共聽嬌喉一鶯囀
遏雲妙響發朱脣不讓開元許永新繡陛花驚飄豔雪

明詩綜卷八

三

文梁風動委芳塵翰林才子山東李每進新詞蒙上喜
當筵按罷謝天恩捧賜纏頭蜀都綺晚出銀臺酒未消
侯家主第強相邀寶釵珠袖尊前賞占斷春風夜復朝
回頭樂事浮雲改塵玉蕤香今幾載世間遺譜竟誰傳
弟子猶憐一人在曾記霓裳學得成朝元隊裏藝初呈
九天聲落千人聽丹鳳樓前月正明狹斜貴客迴車馬
不信芳名在師下風塵一旦禁城荒誰是花前聽歌者
從此飄零出教坊遠辭京國客殊方閉門春盡無人問
白髮青裙不理妝相逢爲把雙蛾蹙水調梁州歌續續
江南年少未曾聞元是當時供奉曲朝使今年海上歸
繁華休說亂來非梨園散盡宮槐落天子愁多內宴稀

始知懽樂生憂患，恨殺韓休老無諫。傷心不見昔人歌，
汾水秋風有飛鴈。此日西園把一危，感時懷舊盡成悲。
含情欲爲秋孃賦，媿我才非杜牧之。

方隱君山園

吳興城南山水勝，竹樹參差萬家映。幽深誰似隱君園，
車馬不來雞犬靜。兩溪迴通柳港曲，一峰立對柴門正。
東西別墅憫更好，孤權往來隨晚興。總令種菜不種桃，
新製長鑱木爲柄。家童頗解候天時，鄰叟還能論地性。
交交林路翳復開，活活野泉流不定。清晨聞鳥欣獨往，
濃綠潑晴畦色淨。老葉垂根孤蚓號，殘英綴梗羣蜂競。
乍繁新蔓喜籬長，欲迸晚芽嫌土硬。此時采擷自足飽，
肯爲食肝煩縣令。古來名園悉可數，金谷辟疆誇獨盛。
鑿石圓開弄月池，買花深作行春徑。愛妾宵陪秉燭宴，
狎朋晝接流觴詠。長年懽樂豈知極，回首芳菲屬他姓。
只今誰解問遺蹤，斷壁摧垣無一剩。乃知厚業要德守，
那得衰榮但言命。君能勤儉遺子孫，應有佳名書郡乘。

憶昨行寄吳中諸故人

憶昨結交豪俠客，意氣相傾無促戚。十年離亂如不知，
日費黃金出游劇。狐裘蒙茸欺北風，霹靂應手鳴雕弓。
桓王墓下沙草白，仿佛地似遼城東。馬行雪中四蹄熱，
流影欲追飛隼滅。歸來笑學曹景宗，新擊黃犗飲其血。
皋橋泰孃雙翠蛾，喚來尊前爲我歌。白日欲沒奈愁何。

迴潭水綠春始波此中夜游樂更多月出東山白雲裏
照見船中笛聲起驚鷗飛過片片輕有似梅花落江水
天峰最高明日登手接飛鳥攀危藤龍門路黑不可上
松風吹滅巖中燈衆客欲歸我不能更度前嶺緣峻嶒
遠攜茗器下相候喜有白首楞伽僧館娃離宮已爲寺
香逕無人欲愁思醉題高壁墨如鴉一半敲斜不成字
夫差城南天下稀狂遊累日忘却歸座中爭起勸我酒
但道飲此無相違自從飄零各江海故舊如今幾人在
荒煙落日野烏啼寂寞青山顏亦改須知少年樂事偏
當飲豈得言無錢

陳卧子云跌宕淋漓
李舒章云神似太白

洞庭山

明詩綜卷八

雷

朝登西巖望太湖青天在水飛雲孤洞庭縹緲兩峰出
正似碧海浮方壺嘗聞此山古靈壤蛇虎絕迹懼樵夫
濤聲半夜恐魂夢石氣五月寒肌膚居人彷彿武陵客
戶種橘柚收爲租高風欲起沙鳥避明月未出霜猿呼
中有林屋仙所都銀房石室開金鋪羅浮峨嶸互通達
別有路往非人塗靈威丈人亦仙子深入探得函中符
玄衣使者不暇惜欲使出拯蒼生蘇後來好事多繼往
石壁篆刻猶堪摹千年玉鼠化蝙蝠下撲炬火如飛鳥
玄關拒閉誰復到似怪衣上腥塵汙勿言神仙事恍惚
靈蹟具在良非誣我生擾擾胡爲乎坐見白髮生頭顱
久欲尋真未能去局束世故緣妻孥何當臨湖借漁艇

拍浪徑渡先雙鳧獨攀幽險不用扶身佩五嶽真形圖
夜登天壇埽落葉自取薪水供丹爐此身願作仙家奴
不知仙人肯許無

答余新鄭

前年吳門初解兵君別故國當西行有司臨門暮驅發
道路風雨啼孩嬰倉皇不敢送出郭執手暫立懷憂驚
我時雖幸脫鋒鏑亂後生事無堪營移家江上託地主
閒園借得親鉏耨耕春朝起沐日照屋野卉雜發鳴鸚鵡
思君萬里不可見對此涕淚如盆傾有壺當軒忍自酌
有句在卷邀誰評走投北郭問消息一客為我言分明
君初隨例詣闕下有旨謫徙鍾離城齋無囊金從無僕

明詩綜卷八

三五

棄家獨去何惇惇長淮黏天趣前渡牙眼怖客浮鬻鯨
到州鞠躬謁太守脫去官籍儕編氓城荒無屋寓來客
旋乞廢地誅蓬荊異鄉何人恤同患喜有楊子兼徐卿
日高破竈煙未起閉戶不絕哦詩聲去年聖恩念逐客
特賜拂拭加朝纓勅君赴汴聽銓擢路算舊驛猶千程
沙河無雨夏雲熱茆葦夾岸多蚊蟲舟中感癘得下泄
刃攪腸腹聞啞嚶荒塗無藥相救療伏枕兩旬幾殞生
終藉神明佑吉士疾勢漸脫身強輕一官署作新鄭簿
捧檄已去詢田更我雖歷歷聽客語虛實未察憂難平
初春天子下明詔欲纂前史羅儒英菲才亦辱使者召
辭謝不得來南京日斜出局訪君舍草滿陋巷春泥晴

入門小女識父友延拜學訴艱難情且云父意念家遠
新遣兩卒來相迎須臾出君寄我札上有秀句如瑰瓊
自陳前事頗一一與客舊說無虧盈讀終呼卒問彼土
卒言幾年經戰爭河山蕭條縣雖小民少姦詐多淳誠
春秋古稱鄆子國溱洧水活魴魚頰雌兔咻咻草間走
雄雉角角桑顛鳴谷深稀逢種田者時有射戶棲山棚
霜天赤棗收幾斛剥食可當江南杭官來撫民務無事
鞭挂壁上無敲掇寒廳吏散獨坐嘯遠對嵩少當檐楹
聞之離抱頓舒豁如汲清露醒朝醒便因卒還寄君語
此邑小鮮聊試烹幸逢昌朝勿自棄願更努力修嘉名
吾皇親手擁高篲灑埽六合氛塵清海中筐筐已入貢

隴外戶版初來呈大開明堂議禮樂學士濟濟登蓬瀛
太廟冬烝薦朱瑟千畝春耕垂青絃用材不肯略疎賤
銖寸盡上天官衡况君磊落抱奇器不異一鶚秋空橫
豈容久屈簿領下天道始塞終當亨文章期君歸黼黻
借問報政何時成

京師苦寒

北風忽發浮雲昏積陰慘慘愁乾坤龍蛇蟄泥獸入穴
怪石凍裂生皴痕臨滄觀下飛雪滿橫江渡口驚濤奔
空山萬木盡立死未覺陽氣回深根茆檐老父坐無褐
舉首但望開朝暉苦寒如此豈宜客嗟我歲晚飄羈魂
尋常在舍信可樂牀頭每有松醪存山中炭賤地爐煖

兒女環坐忘卑尊烏飛亦斷况來友十日不敢開衡門
揭來京師每晨出強逐車馬朝天闈歸時顏色黯如土
破屋暝作飢鳶蹲陌頭酒價雖苦貴一斗三百誰能論
急呼取醉徑高卧布被絮薄終難温却思健兒戍西北
千里積雪連崑崙河水踏碎馬蹄熱夜斫堅壘收羌渾
書生只解弄口頰無力可報朝廷恩不如早上乞身疏
一蓑歸釣江南村

張中丞廟

延秋門上烏啼霜羯兒曉登天子牀江頭老臣淚暗滴
萬乘西去關山長公卿相率作降鹵草間拜泣如羣羊
當時不識顏平原豈復知有張睢陽孤城落日百戰後
瘦馬食尾人裹瘡男兒竟爲忠義死碧血滿地嗟誰藏
賀蘭不斬上方劔英雄有恨何時忘千年海上見祠廟
古苔叢木秋風荒摩挲画壁塵網裏勇氣擘擘虬顛張
巫歌大招客酌酒忠魂或能來故鄉

青丘子歌

青丘子懼而清本是五雲閣下之仙卿何年降謫在世
間向人之道姓與名躡屩厭遠遊荷鋤嬾躬耕有劔任
羞澀有書任縱橫不肯折腰爲五斗米不肯掉舌下七
十城但好覓詩句自吟自酬賡田間曳杖復帶索菊人
不識笑且輕謂是魯迂儒楚狂生青丘子聞之不介意
吟聲出吻不絕咿咿嗚朝吟忘其飢暮吟散不平當其

苦吟時兀兀如被醒頭髮不解櫛家事不及營兒啼不
知憐客至不果迎不憂回也空不慕猗氏盈不慚被寬
褐不羨垂華纓不問龍虎苦戰鬥不管烏兔忙奔傾向
水際獨坐林中獨行斲元氣搜元精造化萬物難隱情
冥茫八極遊心兵坐令無象作有聲微如破懸蝨壯若
屠長鯨清同吸沆瀣險比排淨嶸靄靄晴雲披軋軋凍
草萌高攀天根探月窟犀照牛渚萬怪呈妙意俄同鬼
神會佳景每與江山爭星虹助光氣煙露滋華英聽音
諧韶樂咀味得大羹世間無物為我娛自出金石相轟
鏗江邊茆屋風雨晴閉門睡足詩初成叩壺自高歌不
顧俗耳驚欲呼君山老父攜諸仙所弄之長笛和我此

明詩綜卷八

元

歌吹月明但愁歛忽波浪起鳥獸駭叫山搖崩天帝聞
之怒下遣白鶴迎不容在世作狡獪復結飛佩還瑤京

周青士云磊落
嶽金極其生動

登陽山絕頂

我登此山巔不知此山高但覺羣山總在下坐撫其頂
同兒曹又見太湖動我前洶涌三十萬頃煙波濤長風
吹人度層嶂不用仙翁赤城杖峰迴秋礙海鷗飛日出
夜聽天雞唱中有一泉長不枯乃是蜿蜒神物之所都
老藤陰森洞府黑樹上不敢留棲鳥常年禱雨車來此
投金符靈旗風轉白日晦馬鬣一滴露三吳巖巒蒼蒼
境多異樵子尋常不曾至探幽歷險未得歸忽聽鐘來

澗西寺此時望青冥脫略塵世情白雲冉冉足下起如
欲載我昇天行古來名賢總何有只有此山長不朽欲
呼明月海上來照把長生一瓢酒浮丘醉枕肱洪崖笑
開口秋風吹落浩歌聲地上行人盡回首

吳中逢王才隨朝京使赴燕南歸

江南草長胡蝶飛白馬新自燕山歸燕山歸不堪說易
水寒風薊門雪朝邸空隨使者車禁闈不受書生謁一
杯勸君歌莫哀歸時應過黃金臺不見荒基秋來土花
紫伯圖已歇昭王死千載無人延國士

戎王追彘圖

前騎脫兔奔後騎驚鴻急火燒秋草獵場空一彘窮追

明詩綜卷八

五

勢難及大小當戶左右賢衆中得雋知誰先君不見天
策將真天子馳一馬殪四豕

南園

君不見平樂館古城何處寒雲滿君不見奉誠園荒臺
無蹤秋草繁白日沈山水歸海寒暑頻催陵谷改皇天
大運有推移富貴於人豈長在請看當年廣陵王雙旂
六纛何輝光幸逢中國久多故一家割據誇雄強園中
懽遊恐遲暮美人能歌客能賦車馬春風日日來楊花
吹滿城南路壘石為山引泉為池辟疆舊園何足奇經
營三十年欲令子孫永保之不知回首今幾時繁華掃
地無復遺門掩愁鴟嘯風雨種菜老翁來作主空餘怪

石卧池邊欲問興亡不能語春已去人不來一樹兩樹
桃花開射堂踰圃俱青苔何須雍門琴但令對此便可
哀人生不飲何為哉人生不飲何為哉

夜聞謝太史誦李杜詩

前歌蜀道難後歌偏仄行商聲激烈出破屋林鳥夜起
鄰人驚我愁寂寞正欲眠聽此起坐心茫然高歌隔舍
與相和雙淚迸落青燈前李供奉杜拾遺當時流落俱
堪悲嚴公欲殺力士怒白首江海長憂飢二子高才且
如此君今與我將何為

贈金華隱者

我聞名山山洞府三十六一一靈蹤紀真籙金華秀出向

明詩綜卷八

三

東南遠勝陽明與句曲樓臺縹緲開煙霞天帝賜與神
仙家靈源有路不可入但見幾片流出雲中花子房之
師赤松子三千年前亦居此飛行恍惚誰解尋漫說至
今猶不死松花酒熟何處遊瑶草自綠春巖幽羣羊卧
地散如石老鹿耕田馴似牛聞有隱君子乃是學仙者
自從入山中不曾到山下世人莫知其姓名以山呼之
不敢輕樵夫忽見苦未識只疑便是黃初平嗟我胡為
在塵網遠望高峰若天壤茯苓夜煮儻許餐鐵杖來敲
石門響

題黃大癡天池石壁圖

黃大癡滑稽玩世人不知疑似阿母旁再謫偷桃兒平

生好飲復好画醉後灑墨秋淋漓嘗為弟子李少翁貌
得華山絕頂之天池乃知別有縮地術坐移勝景來書
帷身騎黃鵠去來遠縞素飄落流塵緇潁川公子欣得
之手持示我請賦詩我聞此中可度難玉枕祕記傳自
青牛師池生碧蓮花千葉光陸離服食可騰化遊空駕
雲螭奈何靈蹟久闕藏荒竹滿野啼猩貍尋真羽客不
肯一相顧却借釋子營茅茨我昔來遊早春時雪殘衆
壑銷寒姿磴滑不敢騎馬上青鞵自策桃筇枝上有煙
蘿披拂之翠壁下有沙石蕩漾之清漪晴天倒影落明
鏡正似玉女曉沐高鬟垂飲援忽下藤裊裊浴鶴乍立
風淅淅匡廬有地我未到未省與此誰當奇埽石坐其

明詩綜卷八

三

涯洄洄引流厄醉來自照影俯笑知為誰落梅撲香滿
接羸暮出東澗鐘鳴遲歸來城郭中復受塵土欺十年
勝賞難再得恍若清夢一斷無由追朝來觀此圖惻愴
使我悲當時同遊已少在我今未老形先疲人生擾擾
嗟何為不達但為高人嗤漢南已老司馬樹峴首已仆
呈公碑唯應學道悟真訣不與陵谷同遷移仙巖洞府
孰最好東有地肺西峨嶺高厓鐵鎖不可攀援以逕上
仰望白雲樓觀空峩巍此山易上何乃遺便與後鶴秋
相期欲借太乙舟夜卧浩蕩隨風吹洞簫呼起千古月
照我白髮涼絲絲傾玉醪薦瑶芝招君來遊慎勿辭無

為漫對圖画日夕遙相思

媯蜚子歌

為及王帝宗
作蓋其號也

媯蜚子乃是軒轅之裔虞鯨之孫混沌既死一萬年獨
抱太樸存竊伏在草野冥心究皇墳早逢三光五嶽之
氣乍分裂天狼下地舐血流渾渾鹿走秦中原蛇鬪鄭
國門俎豆棄草莽干戈歟崩奔媯蜚子便欲東游渡弱
水沐髮滄海朝陽盆又欲西行泝河漢踰崑崙山橫川
阻兩地俱不可以往兮歸來掩戶卧旦昏時黍一區注
醪一樽妻給井白兒牧雞豚不詰曲以媚俗不偃蹇而
凌尊作為古文詞言高氣醇溫手提數寸管欲發義理
根上探孔孟心下弔屈賈魂其質耀金石其芳吐蘭蓀
叩虛答有響蹶險成無痕陸珍雜水怪變狀弗可論幾

明詩綜卷八

三

年兀兀不肯出坐待真主應運九五開乾坤鶴書自天
來幽隱初見拔使者遠造廬雞鳴起膏轄與纂金賈編
尚書為給劄姦魂泣幽冢下恐遭誅殺書成一代進紫
宸鸞旗羽衛夾陛陳閣門導謁稱小臣麻衣不脫拜聖
人捧函近前殿龍顏喜回春勅賚內帑之金與綺段其
文織作銀麒麟蒙恩乞還家以奉白髮親戴古弁垂長
紳自號山澤之臞民媯蜚子幸際明良時無為寂默坐
老東海渚青丘有客鈍且癡與汝欲結同襟期左鼓清
瑟右吹篪作歌共祝天子壽五風十雨萬國赤子同熙

熙

登金陵雨花臺望大江

大江來從萬山中，山勢盡與江流東。鍾山如龍獨西上，
欲破巨浪乘長風。江山相雄不相讓，形勝爭誇天下壯。
秦皇空此瘞黃金，佳氣蔥蔥至今王。我懷鬱塞何由開，
酒酣走上城南臺。坐覺蒼茫萬古意，遠自荒煙落日之
中來。石頭城下濤聲怒，武騎千羣誰敢渡。黃旗入洛竟
何祥，鐵鎖橫江未為固。前三國後六朝，草生宮闕何蕭
蕭。英雄來時務割據，幾度戰血流寒潮。我今幸逢聖人
起，南國禍亂初平事。休息從今四海永，爲家不用長江
限南北。

白下送錢判官岳

白門有垂楊，復有春酒香。此地逢君誰，乃是錢少陽。相

明詩綜卷八

三五

逢旣沽白門酒，相送還攀白門柳。不向公車更上書，却
趨官署初垂綬。日落淮水頭，送君去悠悠。梁王苑裏花
飛盡，明日相思過汴州。

題滕用衡所藏山水圖

滕君興在煙霞間，遠遊十年今始還。畫圖示我有層嶂，
竟似何處之名山。君言我初適東越，酒船橫渡鏡湖月。
醉詠謫仙天姥吟，海光欲曙清猿歇。瑤草春已生，便入
金華行道逢牧羊兒，疑是黃初平。從此西遊楚，江水大
帆如雲挂。空裏柁樓醜，酒喚長風一日看。山一千里不
聞東林鐘，但見香爐峰。波迷洞庭閣，樹隔瀟湘重。白沙
翠壁經過好，就中幾度曾幽討。麻姑壇上埽落花，堯女

祠前薦芳藻晚客湖南逢
鴈回登臨長上楚王臺
天從朱鳥峰頭轉江自黃牛峽外來
蒐奇歷險今應倦默坐舊遊空
數遍時向明窗看此圖好山一
一皆重見我聞君言自歎嗟
身如處女愁離家閉門讀書無
半車髀肉漸生空鬢華牀前塵
土蔽雙屐何不踏之踐苔石幸
逢盛世道路平五嶽尋真皆可
適便當往抱綠綺彈松風行盡
萬壑千巖中仙書探得金匱空
歸來誇君重相逢握手一笑吳門東

過胡博士郊居

胡善筮

頭白蘭陵客幽居共一村
老來吟力退貧去告身存
夕吹鳴梨葉秋泉注稻根
時因來問筮獨叩樹間門

送張司勳赴寶慶同知

明詩綜卷八

三

乍出司勳幕還乘別駕車
按圖猶漢地輸布盡蠻家
山熟蛇懸樹江晴鶴浴沙
郡樓回首處北斗近京華

贈鄰友

同居一塢中只隔水西東
林近書燈露溪迴酒舫通
放鳧長合隊移竹每分叢
只恐君徵起難期作兩翁

江上寄王校書行

寥落舊懽違江邊獨掩扉
鄰家聞暮笛客舍試春衣
宿鳥歸山亂行人渡水稀
相思比花絮斜日繞城飛

送謝恭

涼風起江海萬樹盡秋聲
搖落豈堪別躊躇空復情
帆

過京口渡砧響石頭城爲客歸宜早高堂白髮生

晚登南岡望都邑宮闕

落日登高望帝畿龍蟠山下見龍飛雲霄雙闕開黃道
煙樹三宮接翠微沙苑馬閑秋獵罷天街車闕晚朝歸
明朝欲獻昇平頌還逐仙班入瑣闈

送沈左司從汪參政分省陝西

汪由御史
中丞出

重臣分陝去臺端賓從威儀盡漢官四塞河山歸版籍
百年父老見衣冠函關月落聽雞度華岳雲開立馬看
知爾西行定回首如今江左是長安

清明呈館中諸公

新煙著柳禁垣斜杏酪分香俗共誇白下有山皆繞郭

明詩錄卷八

三五

清明無客不思家卞侯墓上迷芳草盧女門前映落花
喜得故人同待詔擬沽春酒醉京華

春來

客愁擬向春來減春到愁翻倍舊時走馬已無年少樂
聽鶯空有故園思日光晶晶濃熏草風力颺颺緩墮絲
辟歷溝南酒家路共誰來往問花枝

謁甫里祠

衣冠寂寞半塵絲想見江湖獨卧時道跡虛煩明主詔
感懷猶賦散人詩釣船魚去雲迷浦鬪鴨闌空草滿池
芳藻一杯誰爲奠鼓聲只到水神祠

遷城南新居

辛苦中年未有廬東西長寄一囊書未能避俗還依俗
堪信移居更索居葉滿鄰園煙幕幕竹連僧舍雨疎疎
何須許伯長安第此屋翛然已有餘

逢倪徵士

數千里外久相違十八灘頭獨歸自說病來辭幕府
只因愁絕念庭闈吳歌重把還鄉酒蠻布猶穿過嶺衣
話盡三年遊歷事滿庭風雨送斜暉

西塢

空山啄木聲敲鏗花落水流縱復橫松風吹壁鶴翎墮
梅雨過溪魚子生尚有人家機杼遠更無塵土衣裳輕
斜陽已沒月未出樵子歸時吾獨行

送錢塘守

明詩錄卷八

三

繁華莫歎異昇平到郡初煩露冕行幕下吏書催署字
湖中妓舫歇歌聲潮來兩渡皆侵岸日落諸山半入城
休沐南屏煩一到松間尋我舊題名

寄海昌李使君

海上波濤夜不驚使君雖老尚能兵荒煙白鹵家家竈
落日黃岡處處營人雜島夷爭小市潮隨山雨入孤城
明朝硤石山頭路我欲停車聽頌聲

次韻金文學送弟往海上

小陸賢如大陸賢亂離爲客最堪憐橫金海上知虛席
打鼓津頭看發船麥氣曉晴田雉鬪蘗香春暖野鵝眠

明朝夢斷生芳草風雨孤舟過練川

西寺晚歸

遠寺別僧歸隨鐘出煙嶺犬吠竹林間斜陽見人影

陶祕書廣陵送別圖

暮雨潮生瓜步春山樹繞蕪城惆悵離舟欲發江南煙

寺鐘聲

聞舊教坊人歌

渭城歌罷獨淒然不及新聲世共憐今日岐王賓客盡

江南誰識李龜年

秋柳

欲挽長條已不堪都門無復舊毵毵此時愁殺桓司馬

明詩綜卷八

三

暮雨秋風滿漢南

秋夜同周著作宿婁浦

小解寒依竹浦雲酒闌相對說離羣一聲新鴈誰先聽

今夜江南我共君

春思

愁兼楊柳一絲絲客舍江南暮雨時自入春來才思減

杏花開過不題詩

入郭過南湖望報恩浮圖

雨過春陂柳浪香布帆歸緩怕斜陽漁人爲指江城近

一塢船頭看漸長

山中春曉聽鳥聲

子規啼罷百舌鳴東窗卧聽無數聲山空人靜響更切
月落杏花天未明

逢吳秀才復送歸江上

江上停舟問客蹤亂前相別亂餘逢暫時握手還分手
暮雨南陵水寺鐘

吳宮

芙蓉水殿簾廊東白苧秋來不耐風教得君王長夜醉
月明歌舞在舟中

詩話季迪楚宮詞云細腰無限空相妒不覺瑤姬夢裏逢秦宮詞云掖
庭無用思難報願上蓬萊采藥船魏宮詞云至尊莫信陳王賦那得人
間有洛神思非不深窮傷
於巧不若吳宮之近雅也

雨中登天界西閣

明詩綜卷八

三八

青山樓閣楚江東自在蒼茫晚色中故國自遙難望見
不關春樹雨溟濛

送葛省郎東歸

金陵女兒踏春陽金陵客子正思鄉一杯况復送君去
目斷飛花江水長

宿蟾公房

一禽不鳴深樹煙明月下照高僧禪獨開西閣詠清夜
秋河欲墮山蒼然

雨中過山

春雲晦靄澗奔渾風雨行人過一村不似山家深竹裏
乳鳩啼午未開門

吳王井

曾聞鑑影照宮娃
玉手牽絲帶露華
今日空山僧自汲
一餅寒供佛前花

消夏灣

涼生白苧水浮空
湖上曾開避暑宮
清簟疎簾人去後
漁舟占盡柳陰風

明詩綜卷八



明詩綜卷八

三九

蘇軾詩集卷八

蘇軾詩集卷八

消夏灣

蘇軾詩集卷八

蘇軾詩集卷八

吳王井

小長蘆 朱彝尊 錄

海昌 馬思贊 緝評

楊基 四十九首

基字孟載其先蜀人居於吳為饒介客吳平安
置臨濠復徙河南既而放歸起知滎陽縣謫鍾
離用薦為江西行省幕官坐罪落職居句曲山
中久之起奉使湖南廣右召還授兵部員外郎
出為山西按察副使進按察使尋被讒奪職供

役卒於工所有者菴集 徐子元云孟載天機雲錦自然芙蓉
獨時出纖巧不及高之冲雅 江東之云君

美云孟載如西湖柳枝綽約近人情至之語風雅掃地 顧玄言云廉訪才長逸蕩興多雋永

明詩綜卷九

一

方之錢劉雖未迨元白斯有餘 錢受之云孟載少負才名會稽楊廉
夫來吳下於坐上屬賦鐵笛歌即效鐵厓體廉夫驚草與俱東謂從游
者曰吾在吳又得一鐵優於老鐵矣孟載沒後詩多放失吳人張習企
朝訪求編次得十二卷 陳卧子云孟載如吳中少年輕俊可愛所乏
莊雅 李舒章云孟載如玉袖臨春翩翩自喜 王介人云孟載詞勝
於詩其詠春草云六朝舊恨斜陽裏南浦新愁細雨中亦不失為佳句也
靜志居詩話吳中四傑孟載猶未洗 元人之習故鐵厓亦稱之 王元美
危言謂孟載七律尚短柳如新折後已殘梅似半開時類沈溪沙詞中
語予謂不特此也如芳草漸生歌館密落花偏向舞筵多細柳已黃千
萬條小桃初白兩三花布穀雨晴宜種樂葡萄春暖欲生芹雨頰風頰
枝外蜨柳遮花映樹頭鶯花有仄忙鴛鴦過馬能多慧學鶯啼且自細
聽鶯宛宛莫教深惜燕息恩春入柳淨無餘葉在人蓮池必有一花開子
綠蕪三月雨杏花春水一羣鷓江柳自浮雙鷺雨驛亭楊柳一蟬風
裏小樓雙燕入柳邊深巷一鶯啼江浦荷花雙鷺雨驛亭楊柳一蟬風
山頂雪惟朝北在水邊春已自東來一路詩從愁裏得二分香向客中
過春水染衣鸚鵡綠江花落酒杜鵑紅高樹綠陰千嶂野野棠疎雨一
籬香立近晚風迷蛺蝶坐臨秋水映芙蓉空羅幕有香鶯夢暖綺窗無月
鴈聲寒者筆淺聲橫時綠臉消殘鏡膩春紅小雨送花青見等輕雷催
笋碧抽尖蠶屋柘煙朝焙繭鵲爐沉火書熏茶試填入泥瀉沙皆絕妙
好辭也然其五言古詩足與季迪方駕集亦張企鵬所編吾鄉項氏天
籟閣藏有孟載手錄者卷集六卷中 關七言絕句以勸張本亦無大異

蝮蛇冬未蟄靡草寒更生陽光泄為雷地雷忽有聲上天號令乖致此災異并不然多殺傷兵氣之所成漢庭免三公毋乃非政刑願言調玉燭仰見三階平

一女不得織三人欲無衣一夫不暇耕八口皆啼飢飢寒迫于身誰能不為非西伯善養老仁人為己歸霜寒草木落禽鳥相背飛民心亦何求在於得所依此理勿暫失君子慎其微

鵲巢知避歲終為鳩所居巧者勞不足拙者安有餘溪翁夜結網山人朝煮魚隆準入關中不讀半卷書當時微張韓乃與勝廣俱大拙乃至巧巧者復何如

明詩綜卷九

二

驕驕日千里亦在御者功向無造父能乃與凡馬同韓彭豐駕材驅策遇沛公增本渥注兒意不與項通豈獨知馬難所貴御馬工駕御苟失宜鮮不敗乃翁蕭蕭帳下騅千駟何足雄

韞鷹斂六翮棲息如鷓鴣秋風颯然至聳目思凌霄英雄在承平白首為漁樵匪無搏擊能不與狐兔遭長星巨東南壯士試寶刀落落丈夫志悠悠兒女曹

東鄰夜從軍西鄰曉上官一為死別愁一為知己懽懽者承新恩拂拭頭上冠愁者囑妻孥結束跨下鞍悲懽何不同一危復一安黃塵障東華平地生波瀾朝榮夕賜死轉盼異暑寒寄語承恩人莫歎從軍難

送謝雪坡防禦出郭團練

朝催築城夫暮點團結兵
民皆動搖一日十數驚
所賴官長賢撫勞得衆情
防禦出郊來父老拜且迎
垂髫及戴白羅列車下聽
官家百萬師自足與寇爭
汝自守汝鄉汝自保汝生
閒暇苟不虞倉卒恐見傾
我當徼汝勞薄爾賦稅征
父老共感激聞然動歡聲
旌旗泊甲子五色稍鮮明
豈惟備抄掠大敵固可嬰
問君何能然子弟衛父兄
平川雨初收馬嘶鼓鑿鑿
相送不同往極目秋鷹橫

送陳資深歸廣

丈夫輕別離投老欲入廣
奈何干戈際萬里涉沆漭
茲

明詩綜卷九

三

城頗阜庶有女供奉養世
亂得庵安胡勞問鄉鄙君
言苦無家一夕魂九往鄉
書昨日至捧讀屢泚額四
喪寄淺土未得掩諸壙雖
云敝廬在誰復修祀享感
茲歸意迫無力猶勉強齒
髮固已衰尚足嬰擾攘敢
忘鄉土情偷安戀茲壤吾
聞重感激惜別復加賞天
寒霜露繁撼枯葉響水宿
慎蛟螭山行避魍魎田園
雖荒蕪果實羅粟橡鄰居
喜均還相邀具醅盎酒薄
不得醉且復歌慨慷人生
還鄉樂無物堪比仿喜極
繼以悲歡戚同反掌翻思
蘇臺月照女夜績紡此時
父子情兩地同惚恍安得
混車書妻孥共羅幌茲事
竟難期淚眼一悽愴我家
嘉陵江蹤跡久飄蕩亦欲
問前途逡巡覓西壤

登靈巖和韻周左丞伯溫饒大參介之

單牖集羣英，席窄坐每盍。煙橫半掩寺，木落全見塔。斜
流出渠，分曲徑轉溪。合村妝妍醜，竝野話悲笑。雜童操
吳音，聞僧作梵偈。蒼苔滑難躋，露棘手易拉。磴紆蝻
緣樹，扉敞蝸。啓闔娛賓列，五豆禮佛過。三市晴厓暝，憂
雨秋洞寒。疑臘窗攀盜，果獲檐入避。鸚鵡掬池萍，沾袖
蕙石蘚。污衲琴忘荒，臺弄屨響回。廊踏值險慮，思筇得
奇。卽傾榼，感深怒鬚磔。愁極衰鬢颯，華年倏川駛。雅量
浩海納，嘯歌激秋歔。雄辨肆交沓，禪寂虛無量。道祖清
靜蓋，叩跽蝸觸蠻。變幻雀化蛤，狂遊類飲酎。薄宦避嚼
蠟，終當謝塵鞅。埽屋分坐榻。

明詩綜卷九

四

贈別龔行義

楚孽風雲姿，璞素素玉不琢。隻身躡雙屐，十載食破研。麻
衣閱冬春，睥睨狐貉賤。胷中何所蓄，經史子集傳酒酣
文思涌，強弩機發箭。清真謝鉛錫，越女巧笑倩。紆盤珠
九曲，精粹金百鍊。榮如星森羅，勇若軍後殿。吾黨多英
雄，氣索皮肉戰。西風忽歸來，塵土吹滿面。從容問所歷，
搖首不復辯。但云秋水清，吳松淨如練。方同華表鶴，遽
作幕上燕。去住何太輕，弗得絆以綫。君材非樗櫟，名字
已交薦。淵泉暫蠖屈，霧雨終豹變。賢達坎坷多，豪傑窮
乏先。嗟子書中蠹，解消兩目眩。朝騎瘦馬出，夕飽藜與
覓志慙。點爾狂質匪由也，嗚猥遭周秦厄。不識舜禹禪。

因君動遐想，翅塌足若罾。螺卮白磁罍，聊爲江渚餞。回首芙蓉花，紛紛落紅片。

與陳時敏別

近別會有期，遠別易慘悽。一人失意行，衆賓顏色低。相顧各無語，握手立大堤。白沙飛輕煙，赤草漫路蹊。竈戶八九家，皮肉瘦且鷺。再拜謁官長，鵠立無所齎。孤廳如荒郵，壁落新補泥。日沒官吏散，角角野雉啼。歸來對寒燈，兒女相孩提。雖云去鄉國，喜不聞鼓鼙。官卑職易稱，牛刀用割雞。回首華亭鶴，月白露淒淒。

季迪病目醫令止酒因作此勸之

病目須飲酒，飲酒調微疴。氣血鬱不舒，賴此酒力和。所

明詩綜卷九

五

以雷公方製藥，用酒多活血。必酒洗散鬱，須酒磨製藥。既用酒飲酒，良匪他酒可。引經絡，酒能驅病魔。病目不飲酒，此蓋醫者譌。李白好痛飲，不聞目有瘳。子夏與丘明，不爲飲酒過。飲酒既無害，不飲如俗何。清晨呼東家，買置數斗醪。爛醉瞑目坐，滿面春風醜。陶然物我忘，夢見孔與軻。此藥豈不佳，而乃止酒那。我今勸君飲，君意無媿媿。庸醫或見責，請示省菴歌。

贈毛生

丈夫遇知己，勝如得美官。棲棲無聊中，握手意便懽。古來豪傑人所就，非一端狂言與危行。初若不可干，從容兩陣間。一語九廟安，狐貉不外飾。而足禦大寒，嗟嗟隴

西李願識荊州韓

長洲春

穀波流暖雲花光豔綠蕢津頭洗紅女蝴蝶上羅裙
羅裙秋水上明璫搖白檠飛下雙鴛鴦溘溘潮水響

滄浪波

入苑綠泱泱穀文融暖光東風吹白浪照見赤龍堂
龍堂負貝闕陰火春波熱鮫人賣髯綃夜夜唱明月

登南浦

開船別西山迤邐向南浦帆輕去自速初不用篙櫓
蒼煙中樹橐橐響斤斧一女沙上汲衆漁洲畔語我行
歲云晏况復遠儔侶回首北歸鴻翩翩下寒渚

明詩綜卷九

六

過小孤

大孤俯如盤小孤儼而立羣山如從使左右相拱揖
孤根屹撐拄萬竅爭噴噏瀏瀏陰風旋慘慘元氣濕江流
亘其下震怒莫敢汲汎汎為盤渦深馳作奔馬急躋攀或
失手一駛不可及我來值秋晚木落衆鳥集勿嬰夜船
犀鮫人抱珠泣

望南嶽

我從匡廬來但覺諸山低嗟我望衡嶽雲霄與之齊
下有赤蛇蟄上有朱雀棲仰瞻祝融拔俯揖紫蓋迷五嶺
皆培塿三江為沔蹄巍然南服尊嵩霍相提攜封秩崇
君稱諸神咸朝隋丹書篆寶冊萬古封金泥百王重祀

典赤纁藉玉圭自非精靈通牲帛勞焚齋子方向遠道
無由陟層梯蒼蒼煙霞中喔喔聞天雞緬思昌黎伯恭
默開雲霓靈貺自昭格誠敬良可稽斯人久云沒感念
徒含悽

發衡州

五日白一髮十日皴一膚人生冰雪容終作鞞紋麤今
朝清鏡中已與昨日殊不憂鬢蒼但恐皮肉枯肉枯
亦常理所念非壯圖有親恩最深撫養勞勤劬憐我幼
失怙愛我如掌珠斯恩未及報不敢忘須臾書來得凶
問哀頓空號呼衣衾與棺斂弗得親走趨家山在萬里
那能返故都樹頭啞啞啼媿殺反哺烏有子初學言行

明詩綜卷九

七

步要母扶已解索黎粟未知識之無重在託宗祀豈暇
問賢愚弟妹皆飄零遠在天一隅仲氏久無信夢中時
友于艱難片鹵濱何以保微軀計工當已還母乃東歸
吳童僕各分飛僅有赤脚奴矜坼苦肺疾終夜聲嗚嗚
憐渠亦解事剪伐供樵蘇異鄉骨肉遠賴此相支吾嗟
我客梁楚隻身亦崎嶇白晝畏豺虎夜防狸與狐所賴
筋力強竄伏幸無虞今年覺衰倦自怯行遠塗東風洞
庭波落日青草湖魚龍來欺人煙濤慘模糊茲晨過衡
陽霽景差可娛桃花白練帶春水綠菰蒲感此顏色妍
暫使憂心甦萬事信有命撫膺長歎吁

暮江散微雨風定波自碧一鷺立不飛雙鴻遞相直餘
煙菱女唱新月漁郎笛此處忽懷人相思杳何極

遠浦歸帆

輕帆挂春風倒影湘江綠天低浦漱遠歸向誰家宿遙
指落花西黃陵廟前屋

洞庭秋月

湘水秋更清湘月秋更白光輝一相蕩水月不辨色何
處洞簫聲巴陵夜歸客

湘女

湘水旣瀾瀾湘山亦峩峩空明影上下但覺魚鳥多我
方駐輕橈聽彼湘女歌湘女佩幽蘭徐行拂青莎春風
吹衣裾芳香動微波淑質自妍麗不待綺與羅真修慎
所適窈窕山之阿盈盈青樓婦日暮將如何

清溪漁隱

清溪秋來水如練歷歷魚鰕皆可見綠蓑酒醒鴈初飛
風急蘆花吹滿面溪南一帶是青山逢著垂楊便可灣
謾道白鷗閑似我漁舟更比白鷗閑

聞蟬

蒼菴四十未聞道偶於世事無所好尋常惟看東家竹
屈指十年今不到微軀之外無長物寒暑一裘兼一帽
妻孥屢欲升斗絕不獨無煙亦無竈身輕自笑可駕鶴
眼明豈止堪窺豹人情世故看爛熟皎不如污恭勝傲

有瑕可指未為辱無善足稱方入妙此意于今覺更深
靜倚南風聽蟬噪

廢宅行

弓刀挂牆旗拂瓦行人過門須下馬
甘暮將軍縱酒歸
白棒橫街入亂打朱門一閉春草積
官印斜封泥浣壁
守卒收鰕屋後池鄰翁曬麥階前石
簾幕當年盡綺羅
網絲顛倒腐螢多杏梁風雨丹青濕
時有野鳩來做窠
樓臺易成還易廢前年猶是桑麻地

聞鄰船吹笛

江空月寒露華白何久船頭夜吹笛
參差楚調轉吳音
定是江南遠行客江南萬里不歸家
笛裏分明說鬢華

明詩綜卷九

九

已分折殘堤上柳莫教吹落隴頭花

長江萬里圖

我家岷山更西住正見岷江發源處
三巴春霽雪初消
百折千回向東去江水東流萬里長
人今漂泊尚他鄉
煙波草色時牽恨風雨猿聲欲斷腸

秋霽雜賦

三首

劉表知先主懷王識沛公未聞收夏口
先已入關中
今古車書異興衰曆數同方驚雞作鳳
當信鴛非鴻
今日長洲苑秋風列羽旗不圖新約法
復見舊威儀
鼓舞兒童樂歌謠父老悲煙埃方袞袞
禾黍正離離

晚樹霜猶碧化雨未黃戎衣輕繡錦
旅食尚糲糠
驛

路千山隔河流一葦航毋憂兵不戰已定法三章

雨

雨急愁雲黑窗虛愛竹青石泉流細細山鳥去冥冥醉裏傾荷葉飢來煮茯苓不知劉道士何用換鵝經

偶題

身嬾交游絕時危感慨新清江催短鬢芳草怨歸人花落縱橫雨鶯啼淡蕩春欲搖舟楫去波浪沒平津

送王仲容之上海

薄宦依東海孤城隔茂煙花疎寒食後人遠暮帆前深巷編蒲履斜岡種木棉毋煩厭荒寂微祿有畚田

寄海鹽楊若官

明詩綜卷九

十

海嶼通村險邊城出敵遙旗燈秋塞雨鈴柝夜薄潮士飽爭投石農閑數舞筩毋令廢收穫高隴有枯苗

夏夜有懷

重露澄秋色輕風生夜涼碧看湖草亂紅愛渚蓮香有弟徒相憶何人不異鄉悲笳在城上雙淚落衣裳

贈瞿好問

笑爾山城隱柴門對縣衙酒資千畝苧生計一園瓜雨步荷巾濕風吟蓆帽斜時時扶短杖看竹到東家

長沙雜詠

湘人愛樓居斜枕湘江起樓下倚闌人簪花照春水

夢綠軒

夢裏綠陰幽草，畫中春水。人家何處？江南風景，鶯啼小
雨飛花。

吳中行樂詞

單羅小扇夾紗衣，冠子梳頭插翠薇。知是范家園裏醉，
無人不戴杏花歸。

紅綠蕉二仕女圖

兩樹紅蕉隔禁扉，曉涼攜伴試羅衣。金鈴小犬迎人吠，
應怪秋來出院稀。

故山春日

千花萬萼委塵埃，只有茶蘼獨自開。應是鄰家更零落，
過牆蝴蝶又飛來。

明詩綜卷九

十一

遇史克敬詢故園

克敬自長洲來，因詢吳中風景，大異往昔，賦此以寓鄉里之思。

三年身不到，姑蘇見說城邊柳半枯。縱有蕭蕭幾株在，
也應啼殺樹頭烏。

贈京妓宜時秀

欲唱清歌却掩襟，晚風亭子落花深。坐中年少休輕聽，
此曲先皇有賜金。

到江西省看花次韻

生色屏風一面開，輕羅團扇合懽裁。深深院落青青柳，
縱是無花也看來。

鯉魚山阻風天甚寒雨皆成霰

江南天氣大無憑，草色煙光暖欲蒸。向晚鯉魚風乍急，

盡吹小雨作春水

望武昌 二首

吹面風來杜若香
離離煙柳拂鷗長
人家鸚鵡洲邊住
一向開門對漢陽

春風吹雨濕衣裾
綠水紅妝画不如
却是漢陽川上女
過江來買武昌魚

祁陽道中

疎煙小雨濕流光
愁得楊花不暇狂
半晌春晴便飄蕩
綴人簾幕上人牀

張羽 二十三首

羽字來儀以字行
更字附鳳淪陽人
從父宦游

明詩綜卷九

江浙兵阻不得歸
遂居吳興元末授
安定書院

山長明初徵起廷
對稱旨擢太嘗司
丞兼翰林

院同掌文淵閣事
以事竄嶺外未半
道召還抵

京知不免自投龍
江死有靜居集

張企翱云國初以高楊張徐此唐之四傑故老言不惟文才之似而其攸終亦不相遠者蓋盈川令終如一太史之斃同乎賓王北郭雖不溺海僅全首領而非首丘先生投龍江又與照鄰無異噫亦異矣 王元美云張來儀徐幼文如鄉士女有質

有情而乏體度 程孟陽云靜居五言古詩學杜學韋各有神理非苟然者歌行材力馳騁音節諧暢不襲宋元格調律詩清員渾脫不事雕績全是唐音頰頰高楊未知前後或謂張徐不及高楊此耳食之論也詩話來儀五古微嫌鬱轉近體亦非所長至於歌行雄放駸駸欲度李迪前固當合超幼文跨躡孟戴

春初遊戴山

雲羅橫四海田野無遺英
尚賴二三子共怡山水情
煦煦新陽動寥寥天宇清
昔人稱四美絃晨遂成并
前登

高丘阻遙睇澄湖明憑林招遠風松檜自成聲俛仰天地間微軀良不輕安能自羈束坐使衆累縈處賤足爲貴抱素詎非榮道遙解神慮庶以適吾生

春山瑞靄圖

鶯啼山雨歇前川綠正繇人家在深樹雞犬晝無喧澹澹流水意依依田父言謾鼓木蘭楫往溯桃花源即此堪結廬可以傲華軒

立秋日早泛舟入郭

連霖啓秋期金氣晨已兆溪雲合餘陰水霞相照耀登艫泛涼颯乘流駕奔峭迴波蕩塵襟青山列遠眺蒲葦迷森沉菱荷爭窅窅沙明衆女浣潭淨孤禽嘯端居積百憂暫出窺衆妙好爵豈不懷衛生乃其要寄謝滄海人如予可同調

擬過園隱阻雨

在遠每傷離在近還成隔飛雨渺無涯佳期悵難得人寒市井空天晚江潮白知君掩閣卧終朝遲來客

金川門

兩山夾滄江拍浮若無根利石侔劒戟風濤相吐吞維天設巨險爲今國東門試將一卒守堅若萬馬屯吾來犯清曉天空霜露繇列宿森在列北斗峭可援江光合海氣溟滓神攸存俯視不敢唾中有蛟龍蟠浮屠者誰子高居凌風幡下見渡口人擾擾螽蟴誼媿彼超世士

去去將何言

李辰山云是詩作於洪武甲寅未三十載而燕師從此入矣讀之可勝浩歎

清口

豁達兩河口前與黃河通高岸忽斗折清淮匯其中甘
羅城在南韓信城在東一為秦人英一為漢家雄人生
有不死所貴在立功方其未遇時鹿鹿何異同時苟
未會丈夫有固窮舍舟登高防歲暮百草空坡陀隴畝
間一二老弱翁遺跡不可問但見荒榛叢行行重回首
目斷雙飛鴻

余將軍篆書捐本歌

即忠襄公關也

余將軍守舒州舒州之城大如礪長江西來繞城流賊
船如雲壓城破將軍提劔城頭坐劔未動虜已奔鯨鯢

明詩綜卷九

十四

蔽江江為渾孤軍六年二百戰王師不來城自存無兵
猶足戰無食安可支豈無愛妾與愛馬殺之不解壯士
飢力盡矢竭將奚為倉皇辭舌罵不已義士千人同日
死祇今還有盡忠池碧血清冷化為水將軍持節東州
時作此篆書形崛奇妙墨已隨神物化好事當時臨得
之雖非其真意獨在垂金屈玉蟠蛟螭我拜重是忠臣
跡秦相雖古其人非嗚呼將軍此書配者誰請君摹取
浯溪石上中興碑

畫雲山歌

我昔曾遊廬岳頂欲上青天凌倒景山中白雲如白衣
片片飛落春風影雲晶晶兮花冥冥萬壑盡送洪濤聲

恍然坐我滄海上金銀樓觀空中明上清真人笑迎客
夜然桂枝煮白石手持鳳管叫雲開虎咆龍吟山月白
明發邀我升東峰導以絳節雙青童天雞先鳴海出日
赤氣照耀金芙蓉屏風九疊花茸茸霧閣雲窗千萬重
胡不置我丘壑中一朝垂翅投樊籠空留萬片雲挂在
清溪千丈之寒松愁來弄翰北窗裏貌得雲山偶相似
遂令殘夢逐秋風一夜孤飛渡江水夢亦不可到圖亦
不可傳不如早賦歸來篇山之人兮待我還安能齷齪
塵土間坐令白雲摧絕無所歸青山笑我凋朱顏

米南宮雲山歌

古之画法不復見六朝人物留遺譜後來山水出新意

明詩綜卷九

十五

二李三王差可觀洪谷之後有關荆營丘渾雄獨造古
華原處士志奇崛餘子紛紛何足數郭熙平遠疑有神
北苑爛熳皆天真画院宣和衆史集俗筆姿媚非吾倫
豈知南宮迥不羣一掃千古丹青塵神閒筆簡意自足
窈窕青山行白雲黃侯黃侯安得此元氣淋漓猶滿紙
晴窗拂拭對高秋恍忽神遊華山裏生兮画癖奈此何
爲子試作雲山歌珍藏什襲子須記世間名画今無多

李遵道墨竹歌

墨竹昉自何人始輞川石刻今餘幾後來蕭悅稍出羣
香山侍郎獨稱美洋州太守善寫真長帽先生差可擬
江南謾作金錯刀枝葉離蕪何足齒北方作者誇澹游

房山繼之妙莫比吳興公子最擅名同時亦數薊丘李
薊丘有嗣能傳家筆勢翩翩此共是一筆玉立無因依
風露淋漓猶滿紙想當塗灑發幽興靜對山僧北窗裏
江湖無人老成盡百藝荒涼今已矣展圖三歎墨君堂
秋聲滿座悲風起

唐子華雲山歌

前朝画品誰第一房山尚書趙公子二公何以能絕倫
丘壑乃自胷中起由來書画總心畫政自不在丹青裏
當時豈無劉與商屏障紛紜何足齒唐侯本是雲川秀
愛画仿佛董與李長松平遠早已工更上歙州看山水
歸來却師郭咸寧參以房山勢莫比始知絕藝老更成

明詩綜卷九

十六

庸夫俗輩那知此此圖三尺誰為贈雲氣蒼茫石塊磊
牛羊未歸樵子出戶牖寥落蒼厓底寫成不題歲月字
要是頭白居鄉里乾坤浩蕩江海空後人未續前人死
為君題詩三歎息世上好手今餘幾烏乎尚書公子不
復見得見唐侯斯可矣

画山水行

題趙待制仲穆所画江浦歸帆
秋林瀟灑二圖沈才幹所藏也

古來名画傳父子唐有二李蜀兩黃吳興公子冠當代
雍也繼之早擅場宋祖子孫盡龍種毛骨固是非尋常
珊瑚寶玦久零落空有妙藝傳文章至元天子親召見
徒步便賜中書郎奏圖每得天顏喜盛以金匱白玉堂
遂令世人爭貴重門戶雜還如堵牆雍初騰蹕晚一蹶

五陵豪氣無時忘吳姬越娥坐相擁始肯落筆揮縑紉
五日十日一水石屏障彷彿生輝光君家雙圖何所得
私印乃出牟陵陽一圖汗漫秋水闊鴈鴻排序投瀟湘
山僧悄尋孤寺遠客子喜甚高帆張一圖律兀衆峰出
疎林葉赤天雨霜消搖巾舄者誰氏可是商顏之綺黃
風塵瀕洞二十載玉軸錦題多散亡圖書祇應天上有人
間那得千金藏從來好事多成癘雲煙過眼如毫芒
君不見王家桓家勢盡時複牆走棘不得將何如城南
佳山水千巖萬壑摩青蒼與君對此飲美酒雖無南宮
北苑庸何傷

米元暉雲山圖

明詩綜卷九

十七

前代幾人画山水逸品只數南宮米海嶽樓前北固山
頃刻雲煙生滿紙古云丘壑起心胃恍忽似與神靈通
素壁高懸卧清晝耳邊恍若聞松風怪底青山起毫末
森沉綠樹臨溪活仙人道士疑可招芝草琅玕俯堪掇
千里能移方寸間天機揮灑過荆關如今画史空無數
對此高蹤詎敢攀

倪元鎮画竹沈御史所藏

雲林之子有仙骨平生好潔如好色紛紛濁士等沙蟲
嗚呼瓚也何由得憶昔常登清闕堂鵲尾爐爇龍涎香
紹京妙墨僧繇画示我不啻千明璫人間萬事如飛電
洗玉池空人不見季子城東土一坏何人為著黔婁傳

繡衣使者騎青驄曾聽竹枝湘水東歸來見此若夢寐
巴陵洞庭生眼中江湖豪翰今零落君得此圖良勿薄
媿我題詩憶故人黃鶴題詩下寥廓

錢舜舉溪岸圖

憶昔至元全盛日天子詔下徵遺逸吳興八俊皆奇才
秀郎王孫稱第一一朝玉馬去朝周諸子聲名總輝赫
豈知錢郎節獨苦老作畫師頭雪白江南沒骨傳者希
錢也得法誇精奇晴窗點染弄顏色得錢沽酒不復疑
今人祇知重花鳥豈識此圖奪天巧玄雲抱石雷雨垂
蒼山夾水龍蛇遠岸側溪回共杳冥蒲稗深沉映魚鳥
漁舟乍隨遠煙散客子競渡澄江曉自云布置師北苑
只恐庸工未深了卷餘更有魏公題字擬鍾王差未老
鄭侯得之恐神授使我一見喜絕倒雙溪流水清何極
城外南山空黛色文章翰墨何代無二子儔能躡其迹
為君題詩三歎息於乎古人難再得

胡廷暉畫

畫師我識吳興胡身長八尺蒼髯須目光至老炯不枯
藻繪萬象窮錙銖大兒十歲能操觚小兒五歲能含朱
得錢但供酒家需時復縱博為歡娛魏公家藏摘瓜圖
妙筆奚翺千明珠胡一見之神頓蘇以指畫肚潛臨摹
洛筆便與前人俱祝融撐空閣道孤朝雲暮雨相縈紆
中天碧瓦仙人廬下有桃源風景殊雞犬似是先秦餘

潯陽野客山澤臞自從喪亂遭窮塗幸逢治世容微軀
堯舜亦有巢由徒已辦小艇長鬚奴便欲往從漁父漁
江湖此境何地無

趙文敏公家藏小李將軍捕瓜圖歷代寶之常情廷暉
全補暉私記其筆意歸寫一幅賢公公大驚賞謂其亂

真由此名實俱
進故詩及之

青弁雲林圖

前代何人画山水長安關全營丘李華原特起范中立
三子相望古莫比亦有北苑與河陽後來作者誰能當
米家小虎出逸品力挽元氣歸蒼茫房山尚書初事米
晚自名家稱絕美藝高一代誰頡頏只數吳興趙公子
當時弭節匡廬峰曾寫太平興國之神宮五峰却立疑
爭雄臺殿突兀紛青紅中有雲氣隨游龍我對此圖卧
三日遂令奇氣生心骨亂來學士遭漂蕩文藝草草誰
能工筆精墨妙心更苦那得再有前賢風於乎乾坤浩
蕩江海闊使我執筆將安從

莘叔耕画梅雪軒

自注叔耕名野世
居湖州蓮花莊

好畫誰如莘棗強墮馬折肱猶未忘何年寫此寒林趣
精絕未數左手王屋裏何人坐吹笛似是南昌郡中客
曲終朔雪忽飛來開門滿樹梅花白

贈琴士

有客夜半來山中橫琴坐石彈松風松風曲罷抱琴去
落月一聲天外鴻

聽老者理琵琶

老來絃索久相違心事雖存指力微莫更重彈白翎雀
如今座上北人稀

取勝亭感舊

細雨微消紫陌塵湖光冷落似無春朱門記得曾游處
楊柳青青不見人

寄天目山雍長老

天目之山青岿堯道人縛屋青山椒白雲出山不歸去
春風吹老黃精苗

燕山春暮

金水橋邊蜀鳥啼玉泉山下柳花飛江南江北三千里
愁絕春歸客未歸

明詩綜卷九

徐賁

賁二十七首

子

賁字幼文其先蜀人徙居吳淮張開閫辟為屬

避去之吳興隱蜀山中洪武初用薦授給事中

改監察御史出按廣東改刑部主事陞廣西參

政遷河南左布政使尋下獄死有北郭集

王元美云方伯體裁精密情喻幽深頗似錢郎顧玠言云方伯詞采道麗風韻凄朗始如楚客叢蘭湘君芳杜每多惆悵

編謂幼文以丙辰起家其卒以癸酉七月子孝洪武六年癸丑幼文與呂志學宿蜀山書舍為志學作畫次年甲寅衍師過佛慧精舍題此畫云幼文仕於朝季迪已登鬼錄則幼文以甲寅入朝非丙辰也庚申七月志學題幼文畫云幼文已矣而畫獨存則幼文之死於獄當在己未

庚申間非癸酉也載觀高張二集高有答余新鄭詩云君初隨例詣闕下有旨諭從鍾離城異鄉何人恤患難喜有楊子兼徐卿去年聖恩念

逐客特賜披拭加朝纓初春天子下明詔辭謝不得求南京楊即孟載也余則永嘉余堯臣北郭十友之一蓋三人同受淮張辟為採屬吳亡

例謫臨濠洪武二年放歸余主新鄭簿楊知棗陽縣徐未知何官當亦此時除授而季迪微修元史正在南京得相贈答也楊有夢綠軒詩序

云子與徐君幼文同誦鐘離結屋四楹幼文居東楹子居西楹詩云去年吳城正酣戰却倚危樓望蕙蔭今年放逐到長淮萬綠時教夢中見則楊徐謫濠在吳亡之次年其赦除在洪武二年歷歷可考而張習以為吳亡後幼文隱居蜀山洪武七年用薦起家習自謂得諸故老傳聞其入朝死獄之年

一一辨誤何與

詩話呂志學題幼文所画山水圖謂肆筆道麗清潤而帶書法於詩亦然才氣方之高楊張三君猶為未達然詩法嘉然森有紀律長篇險韻極其熨帖頗有類皮陸者張來儀先從吳移居戴山以詩格幼文云吳興好山水子我蓋遷居繞郭羣峰列迴波一鏡如蠶餘即宜稼樵罷亦堪漁結屋雲林下殘年共讀書幼

文乃移居蜀山兩山蓋相望也

猛虎行

爾虎從何來據住三叉口昨日啖東家豬今日噬西家
狗山中百獸不敢鳴白楊黃竹陰風生鄰家少年憑意
氣彎弓挂箭巡山行夜深月黑候虎出明朝荒草餘白

骨

明詩綜卷九

三

農父謠送顧明府由吳邑陞常熟

我家茅屋臨官道前種桑麻後黎棗年年力作不違時
人有餘糧牛有草官長下車今五年老身不到州縣前
鄉無吏胥門戶靜家家盡稱官長賢大男入郭買田具
始知官長移官去來時憶向官道迎今日去時須送迎
攀轅欲留留不止我民倉皇彼民喜殷勤再拜官道旁
願飲三江一杯水

柳短短送陳舜道

柳短短春江滿蘭渚雪融香東風釀春暖山長水更遙
浩蕩木蘭橈蘭橈向何處送君南昌去離愁落日煙中

樹

白蘋花送王汝器

白蘋花綠蘼草南風吹碧波五月湘江道人勸酒離
緒多權女權郎歌權歌黃鸝啼時風景好大堤日落奈
君何君今去不可留山疊疊水悠悠

八月十五夜飲王擴相川別業得動字

風高海雲收月出天宇空今日寒暑均適與諸君共懽
深坐忘永契合飲易痛露螢寒不飛水鳥夜停呀山精
各潛匿銀蟾忽飛動亭亭廣寒桂不知何年種我欲問
嫦娥素鸞無由控佳節屢變更壯心久恹恹人生非仙
骨有樂當自縱惜無桓伊笛爲爾作三弄

過荷葉浦

明詩綜卷九

三

粼粼水溶春澹澹烟銷午不見唱歌人空來荷葉浦無
處寄相思停舟采芳杜

尹明府吳越兩山亭

長江接海門一水限吳越兩山鬱相對峰巒各羅列勁
勢爭吐吞蒸嵐互出沒尹君好游觀結亭山水窟闌干
出層巔細路縈百折崩石絡垂蘿老樹著棲鷗平生登
臨興盡爲山水發不知嘗膽人此地幾征伐至今兩山
雲來往似奔突嗟余容江海所歷多奇絕何當上斯亭
長歌弔遺烈

簷簾軒

小軒闕幽寂迴闌碧筠護寒色晴晷池垂梢晚縈露陰

疑訝煙積籟起知颺度瑟瑟含夕清蕭蕭澹秋素不有
虛心人何由同歲暮

菜邁為永嘉余唐卿右司賦

遠辭華蓋居來卜山陰宅乍到俗未諳久住地旋開屋
廬尚朴純楹桷謝雕飾高營踞山跼深甃逗泉脈檐將
狼尾苦門用鼠筦織缺垣唯補蘿圮砌總蒙藹編籬限
邇鄰封枿表殊場本來是野性豈是耽地僻學圃欲擬
樊為功敢侔稷寧惜勞外形自甘食餘力耕鉏限兒課
灌溉當僕役破塊何昀昀陳器亦畧畧駕許俗士回屐
向鄰翁借筐筥織湘材鋏鍤鑄棠液卓饗鷹背利負蓑
蝟毛磔俯仰疲枯椽沾灑漬襍襖循畦行策鏡偃林卧

明詩綜卷九

五

敲石鎌披欲芟丘刈削竟驅礫值阜即為坡遇凹就成
湓堤崩防密葭竇隙拒亂棘地同農畝計區學井田畫
長畛縱復橫曲渠廣還窄接流引餘清疏沼匯深碧架
桁秋實垂籬落夏蔓冪雨露加膏腴糞土發磽瘠識種
題裏藏辨類分行植時法常按譜候時即看曆蕨芽拳
握紫薑檠拇駢赤兩合憐薊葦叢生愛鉞芑初蔞迸蟄
雷新臺長春菽雀弁莞葉峨馬帚莖直黃繁微颯縣
瓠老枯辦拆芍苗卷龍鬚藥幹擁牛膝黃獨雪晴收紫
葦露晞摘陰階茂蕨萑下田豐菲蔥卷輪木耳垂攢刺
菱角射秋茄采更稀夜韭剪仍殖芝芳凝海瓊芡鬱點
池墨枸杞香可膠竹筴熟堪腊石皮被柔薄土酥膾肥

酌細尊入饌鱸鮮萋雜羹鯽茶苦榮與儔松脆水為敵
茵蘆西蜀致首宿大宛得長縈苻帶流亂簇陳絲繹芹
效野人獻瓜為天子副決明纔一方蒿苳連數席瑠磨
慰渴心玉延起羸疾葦毒笑非喜芥辛泣詎戚盤根芽
蕤瓌脫穎笋穿壁擷香隣雞蘇折甘嗜燕麥粟腐切方
圭乳餅斲員餅孕子梭受剗贅聃石被馘兔目洵夏槐
鹿角芘臘炙菁託諸葛呼巢以元修斥諸葛元修
二菜名 萹蓀蔡
守清薇怨周節逆邪蒿義所攘穢莢理堪啞薄利嘉拔
葵省謗惡遺蕙窮餐齏酸黃儉啖薤留白閑情付田園
生意仰膏澤莢齊翠疑剪甲坼綠訝擘掩冉煙際姿蔥
舊雨餘色始掇惜滓染載滌畏蟲螫新薦或在邊薄湘

明詩綜卷九

古

亦須鬲求久漸投醴致爽遽沃醑不煩僚友送敬向先
聖釋對屠誇大嚼燕客忻小摘梓羞不過二甕道當飲
百未能著蔬經安敢踰食籍旨蓄足山厨素供過香積
用茲卒歲年庶得勤朝夕賓魏徐見厭厄陳顏自澤潔
畚上恥污造橋盜懷恤抱甕忿設機授書誦求益用侯君
房微嚴
光縱馬因致憂吞蛭遂亡謫萬錢柳復乞片金華還擲
仕知呂姪妾居味鄭人識枕肱仲尼樂傷指范宣扼鼎
孺固云嘉食單亦足適敷淡分所安堪味欲易極毋因
口體累遂使愆民德

登戴山

在湖州臨湖
門外二十里

平田渺空曠孤岡忽高峙新松蔭其巔白石縹其趾初

登若嶄絕稍上乃如砥亭亭日暮側肅肅征鴻駛南拓
天目雲北覽具區水比來局羈絆遊遨喜茲始同心良
可重懼言得佳士非惟外累遺沉憂亦成季薄暮聊旋
歸餘興會留此

種菊

蕭條齋舍前隙地頗高爽茲焉倦耘鋤而乃成廢壤邇
來學種竹始為驅草莽掩苒籬落間枝葉紛以長雖煩
灌漑勤亦藉雨露養秋香固所悅晚節益可仰匪曰表
隱名聊以備幽賞

荆山

荆山揭高厓塗山聳橫壑長淮出兩間中斷見斧鑿於

明詩綜卷九

五

焉束洪流浪起石鬪角誰能為此功在昔大禹作至今
遺廟存香火乃寂寞我來問邑人往事竟緬邈於時春
正深草木尚荒落登臨欲開襟覩茲反不樂

壽州

舟行夜達曙路入硤石口平山帶孤城一塔起高阜問
知古壽春地經百戰後羣孽當倡亂受禍此為首彼時
土產民十無一二有田野滿蒿萊無復識畎畝去程不
可稽欲望敢遲久

潁川

客程不論遠所求在陰晦惡風滿川來雨勢晚逾倍船
爭急流上寸進還尺退枯葭夾崩沙路轉數百匯颯颯

孤蓬飛琅琅萬珠碎篙師左才坐客默與對去心雖
云迫前途苦茫茫味德星無後覩洗耳亦何在有懷仰高
風令人發深慨

盤子城

前登盤子城山隘勢欲迫路迴土峭絕傍夾千仞壁石
狀如矩斲巨細總方直無泉土脈死草木盡改色高巔
有堡障重門閉重棘陰慘行人險惡意巨易測信知狐
鼠輩得在此中匿我生好壯觀努力更攀登立久日將
晡浮雲渺鄉國

天井關

峰迴抱深壑下視天鑿井昔人建重關扼險備邊警鍵

明詩綜卷九

三六

鑰久已絕垣石尚森整峨峨尼父祠門掩衆山靜曾聞
此回轍無復過斯境詢知鄉老言此事古未省餘氓數
家在破屋暮煙冷我行力稍疲景物不暇領且為投宿
來驚風夜愁永

渡沁

陸行長苦渴今渡沁河水奔騰走百灘聲遠聞數里我
來坐其涯肩擔欣暫弛不意山塢間偶得見清泚連朝
塵沙目豁爾淨如洗雖云倦行力對此亦足喜南風吹
青蒲白鷗忽飛起

沁水縣

一水隨山根宛轉流出迴灘聲繞縣門孤城數家靜風

土殊可怪十人五生瘳
屋響牛鐸聲滿殘日景行遲
欲問宿連戶皆莫肯亭長獨見留半榻亦多幸呼童此
晚炊糲飯穀帶穎野藪不可得敢望肉與餅塗行乃至
此儉素當自省

太陰山

巍巍太陰山厓壁拔嶄峭積水嵌層墟凜若太古造東
深草木堅僵立勢難撓高寒橫障空陽景未嘗到鄰有
羲和墓欲問莫可弔如何於此地獨不被臨照至今山
中鳥性莫識晴昊聊為誌其事因之發長笑

女媧墓

空山兩高冢媧皇此中葬焦土積層巘勢助殿閣壯大

明詩綜卷九

三

哉補天手功出千古上至今鍊餘石火氣夜猶放轟雷
常被護烈風日掀蕩陰林慘可畏怪木高數丈百鳥飛
繞枝欲止不敢向地靈氣所鍾祭禱土人仰經過謁祠
下幸獲拜神像

霍山

霍山古北鎮勢尊出羣麓山深異風景春盡樹未綠居
人苦多寒鑿土為住屋屋頂土元厚亦種麻與菽乃知
此方民猶有上古俗我欲拜其廟日斜去程促窻煙斂
暝色牛羊半歸牧徂塗多嶮巖村館早尋宿

兵後過畢亭山

畢亭西去遠一過一淒然鴈宿蘆中月人歸草際煙漁

家多近水戎壘半侵田尚喜餘民在停舟問昔年

送曾伯滋赴西河將幕

上將初分閫儒官解習兵風旗春獵野雪帳夜歸營洮
水從岷下祈山入隴平知公能載筆草檄報邊聲

送朱知事

惆悵官亭酒如何送客頻尊前莫催別明日異鄉人

送呂庸南

雪色上征衣雲沙鴈自飛去家千萬里只解送人歸

送別沈德虔

江聲千里萬里客路長亭短亭後夜相思何處蘆花明

月沙汀

明詩綜卷九

天

送張景則歸天台

浙江東去有名山路遠天台鴈宕間我未得遊空悵望
是君鄉里喜君還

明詩綜卷九

小長蘆 朱彝尊 錄

長水 杜庭珠 緝評

余堯臣 一首

堯臣字唐卿永嘉人元末自會稽入吳明初謫

濠放還授新鄭丞有菜蒞集

錢受之云唐卿居會稽越鎮帥邁善卿參政呂珍羅

致蒙下有保越之功無意仕進於越之桐桂里治園結菴署曰菜蒞已而入吳居北郭與里中楊基張羽徐賢王行玉彝宋克呂敏陳則釋道

行爲高啓十友洪武二年授新鄭丞見於啓詩其曰司馬曰左司必東越鎮將版授之職銜而今不可考矣

靜志居詩話高季迪春日懷十友詩於余司馬堯臣云列戟衛嚴開鷹無休沐暇夜飲余左司宅云燈銷月窺闌角響霜委砌蒼余左司沈別駕元夕會飲城南詩云故人念我有二子省內郎官府中佐徐幼文菜蒞詩題爲永嘉余唐卿左司賦然則左司之稱本於越鎮將版授而司馬之銜疑唐卿曾仕於淮張也

明詩綜卷十

秀野軒

濕翠浮草芽空青散木杪輕舟理橫塘歸人渡清曉樓
鴉返故巢潛鱗濯新藻倒景澹斜暉迴颺蕩晴昊衡門
夜不扃燕坐事幽討落葉秋自飄殘花春嬾埽我欲往
從之稅駕苦未早揮手謝孤雲去去沒蒼微

王 行 三首

行字止仲長洲人洪武初爲郡庠經師藍玉延

教其子連坐誅有半軒楮園二集 徐子元云行詩清雅不及高楊

詩話止仲好談兵游都門人或尼之笑曰虎穴中好休息也既就涼國西塾數以兵法說涼國涼國卒用是敗平居於十友中最契道行稱之序曰上人非若他人事佛奉師碌碌作沙門者今天下亂已極且必治治然後出於時以發其所蘊其人之志與當世之人安知絲無與人同其志者蓋姑有所待也謂其言亦傾危之士乎至墓銘舉例一書足爲學文者津筏詩非所長也

題趙元臨高房山鍾觀圖

北苑貌山水見墨不見筆繼者惟巨然筆從墨間出南
宮實遊戲父子並超軼高侯生古燕下筆蛭凡骨云云
水墨中探破造化窟嘗圖得鍾觀景象照雲日長松映
飛泉霞采互飄歛今朝見茲畫臨寫意無失慘澹入窈
冥稜嶒隔岑蔚高堂時一舒六月氣蕭瑟平生丘壑性
塵空欣已拂因之興我懷山中斲苓朮

趙吳興淵明像并書歸去來辭

後更畫
竹石

虛館坐清曉高秋零露時佳菊秀可餐墨葩含晚滋芳
馨發孤思寫此歸來辭餘興猶未已寒玉生疎枝孰謂
公子懷不與幽人期撫卷三歎息繫年非義熙

明詩綜卷十

二

房山寒江孤島圖

千山萬山重復重畫力筆力鬪奇雄青紅蒼翠滿縑素
缺處淺碧分遙峰歷觀畫史每如是意謂此法由來同
昨嘗凌秋溯揚子一舸縹緲乘長風洪波吞天杳無際
出沒但有孤輪紅乃知山水有佳處到此始覺塵埃空
當時海岳應飽見落墨便自超凡庸不將層疊競工巧
遂使氣象齊鴻濛平生愛畫惟愛此苦恨妙法無能攻
九州之表有人物意象獨數房山翁茲圖咫尺便千里
小米大米追高蹤愛之歌詠乃常理濡翰自媿言非工
詩成忽復三歎息矯首長望青冥鴻

克字仲溫吳人明初徵為侍書出為鳳翔府巨

知

詩話仲溫任俠自喜挾彈走馬學擢奇陣法張氏據吳欲致不得闔門却掃工草隸書祝京兆評其書法天授布高侍郎為作南宮生傳感舉其詩侍郎又有酬宋軍諮見寄詩云少為鬪雞兒鮮裘奮春明走馬出飛彈撇拔誇身輕氣服諸俠徒不倚父與兄落花錦坊南美人理妝逆酒酣迸五木脫帽呼輸贏及壯家已破狂游恥無成遂尋鬼谷師從之學言兵業成事燕將遠成三關警奇勳竟難圖迴臨石頭城覽時識禍機不因憶尊羹飄然別戎府震澤還東征恥史薦辟書傲然指公卿知音竟為誰四海嗟惻惻又答仲溫見寄詩云念昔文翰場弱蹤繼清塵鳴絃東閣夜飛蓋西園晨誦之可

得其行樂矣惜其詩集罕傳也

秋日懷兄弟

相別幾多時相思淚滿衣家貧經難久世亂得書稀作
史余誠拙從軍事亦非鄉心秋塞鴈盡日向南飛

呂敏一首

明詩綜卷七

三

敏字志學無錫人元末為道士洪武初官無錫
縣學教諭有無礙居士集

書雲林畫林亭遠岫

憶過梁谿宅于今二十年賦詩清閨閣試茗惠山泉夜
雨牽離夢春雲黯遠天鄉情與離思看畫共茫然

陳則一首

則字文度崑山人洪武六年以秀才舉任應天
府治中俄進戶部侍郎謫大同府同知遷知府

錢受之云文度文詞清麗元季傲屋授徒以工詩名於吳下高啓北郭十友之一也

題雲林畫

落花愁殺未歸人亂後思家夢更頻縱有溪頭茅屋在

也應芳草閉深春

孫黃二十首

黃字仲衍南海人洪武中授工部織染局使出

為虹縣主簿選入為翰林典籍復外補平原主

簿罷歸尋除蘇州府經歷謫遼東坐黨禍死有

西菴集

黃才伯云仲衍詩初若不經意而氣象雄偉與喻深致駭

麗如明珠走盤不能自定秀舉雄俊豐麗殆敵乎也王元美云孫仲

衍如豪富兒郎入少年場輕脫自好歐楨伯云明遠以甫五先

生起挾視吳中四傑李時遠云仲衍豪邁璋麗足追作者其七言古

體不讓唐人葉處元云先生五七言古風雖唐人不能遠過

曹潔躬云仲衍善言風景於廣州則云丹荔枇杷火齊山素芙蓉茉莉天香國

於羅浮則云紫極房權倚日開蕊珠樓閣中天起於雲南則云蠻官見

容花布襖邨婦背鹽青竹籃於武昌則云武昌城頭黃鶴樓飛檐遠映

鸚鵡洲漢陽樹白煙景濕行人如鷗沙際立使未至其地者誦之亦當

神往若酒徒散落黃金空獨臥窮檐夜深雨松花酒熟人不歸瑤草東

風幾回碧風韻不減唐人他如荒蘿遠屋秋涼山鬼吹燈冷光濕興

明詩綜卷十

闌移席倚寒梅雙眼如貓對

花碧亦不失為韓冬郎語也

詩話自贊以下世所稱南園五先生也仲衍才調傑出四人五古遠師

漢魏近體亦不失唐音歌行尤琳琅可誦微嫌絲縷耳集句亦工若秋

木為神玉為骨美容如面柳如名遠羅野菜飛黃蝶榭楊花燈白瓊

去日漸多來日少別時容易見時難三湘愁境逢秋色半徑殘燈照病

容野草怕霜霜怕日月光如水如天鶴羣長遠三珠樹花氣渾如百

和香可稱巧合繼之者如桂嶺瘴來雲似墨蜀江風澹水如羅風塵荏

苒音書絕人物蕭條市井空歸目併隨回雁盡離魂潛逐杜鵑飛長疑

好事皆虛事道是無情却有情綠水青山雖似舊紅顏白髮遞相催此

廬陵李損昌祺所集也如眼前好惡那能定夢裏輸贏亦不真傷東潤

水流西潤水錦江春似曲江春雲收雨散知何處燕語鶯啼亦可傷東潤

里關山千里夢

一番夢一番風雨一番啼慘慘悽悽仍滿滴霏霏拂拂亦迢迢

此瓊州丘濬仲深所集也如文章字宙千件事江漢風流萬古情老去

詩篇渾漫與晚來幽獨轉傷神欲知世掌絲綸美肯信吾兼吏隱名繼

欲欲謀良夜醉殊方又喜故人來乘舟取醉非難事送客逢春可自由

花四海交游更聚散十年京洛共風塵說簡書催物役總將談笑出

風塵未共樹色春中見茂苑鶯聲雨後新自歎馬卿常帶病也知光祿

最能詩春浮玉藻寒波落水滴銅龍書漏長佳節每從愁裏過遠書忽

向病中開江淹采筆空題恨荀令香爐可待熏小院迴廊春寂寂北湖

南棗水漫漫敷于世上明開眼莫怪先生懶折腰苦節難違天千命夢

歸偏動故鄉情。寒世盡從愁。老暮年初信。夢中忙。信夢中忙。酒酣舞。誰相挽。
客。自從。不。出。迎。緩。帶。輕。裘。成。昨。夢。濁。羅。襪。飯。在。吾。年。古。來。賢。達。知。多。
少。舊。日。人。民。果。是。非。新。結。草。廬。招。隱。逸。便。應。黃。髮。老。漁。樵。合。歡。國。笑。川。
年。事。奉。使。虛。隨。八。月。查。復。有。樓。臺。街。幕。景。但。將。懷。抱。醉。春。風。故。却。笑。千。
皆。夢。寐。昔。年。親。友。半。彫。零。此。長。沙。李。東。陽。賔。之。所。集。也。如。病。身。最。覺。風。
露。早。離。夢。杳。如。關。塞。長。此。休。寧。程。敏。政。克。勤。所。集。也。如。一。臥。滄。江。鷺。歲。
晚。十。家。山。郭。靜。朝。暉。嗜。酒。何。妨。陶。靖。節。能。詩。重。見。謝。之。暉。此。吳。江。周。用。
行之所集也。如坐看蕉葉。題詩句。醉開道。迴看上苑花。五夜漏聲催曉。
樓臺直與紫微連。東風已綠瀟湘花。濕月射珠光。見闕東深院。沈沈人。
悄悄。春風澹澹。影悠悠。笙歌總舞。庭空裏。臺榭參差。煙霧中小院。迴廊。
春寂寂。前峰後嶺。碧濛濛。離岸游魚。逢浪返。出林幽鳥。向人飛雲。開日。
月臨青瑣。花擁絃歌。咽。西樓晴雲。滿戶。圍傾蓋。濕水。侵階。蹙舞衣。此錢。
唐沈行履。所集也。如卿月夜臨仙掌。動御煙。曾見。紫龍浮。風煙。迸起。思。
深。沈行履。所集也。如念我能書。數十字。似君須向古人求。此上海陸。
夢霄。漢長懸。捧日心。病眼。較來。猶斷酒。新詩。改罷。自長吟。江清露。白芙。
蓉。死雲。散。天。高。秋。月。明。蘄。竹。水。翻。臺。榭。濕。桐。花。風。軟。管。絃。清。胡。蝶。夢。中。
家。萬。里。鳳。皇。聲。裏。住。三。年。愁。將。玉。笛。傳。遺。恨。暗。擲。金。錢。下。遠。入。路。遶。寒。
山。人。獨。去。江。涵。秋。影。鴈。初。飛。陶。令。久。辭。彭。澤。縣。山。翁。長。醉。買。家。池。虛。心。
願。比。郎。官。筆。萬。童。子。吟。才。子。詩。漢。涼。稻。花。資。旅。食。輕。輕。柳。絮。點。人。衣。老。
妻。畫。紙。為。基。扇。童子。開。軒。掃。落花。細。水。浮。花。浮。花。資。旅。食。輕。輕。柳。絮。點。人。衣。老。
鳥啼深樹。獻靈藥。馬飲春泉。躡溪沙。日落。波。波。鷺。宿。鴈。月。風。落。葉。捲。重。門。

明詩綜卷十

鴉共歡。天意同人。意多說明。年是檢年。倦客閉門。三日雨。野橋流水。一。
犁煙。候門。不把馮驩。劍客。路空攜。范蠡。圖。暮雨。自歸山。悄悄。高樓。獨上。
思。依。依。聞。尋。古。寺。消。晴。日。却。聽。鐘。鐘。憶。翠。微。日。暮。酒。醒。人。已。遠。烏。啼。花。
落。水。空。流。清。風。未。許。重。攜手。好。月。那。堪。獨。上。樓。魚。躍。鏡。中。將。綠。破。鳥。還。
天。外。帶。青。來。過。橋。樹。葉。邨。邊。合。隔。岸。柴。門。竹。裏。開。碎。心。雨。夜。重。檐。溜。滑。
足。春。融。一。徑。泥。此。廣。州。張。鎰。所。集。也。如。故里。春光。禁。書。錦。上。林。晴。
日。鈞。朝。衣。莫。言。海。上。渾。無。地。應。是。壺。中。別。有。家。紅。樹。枝。頭。聞。犬。吠。靜。樹。
影。窺。見。人。家。淡。邊。瑤。草。含。朝。露。天。上。珠。簾。卷。曙。霞。風。啼。雲。寶。仙。嚴。靜。樹。
入。天。台。石。路。新。臺。上。鳳。簫。奏。弄。玉。鏡。中。珠。翠。李。夫。人。閒。愁。却。恐。鷺。巢。燕。
往。事。應。須。問。寒。鴻。楊。柳。亭。臺。凝。晚。翠。芙蓉。簾。幕。扇。秋。紅。醉。依。華。屋。春。多。
麗。貴。想。豪。家。月。最。明。天。上。吹。笙。玉。子。晉。雲。邊。度。曲。許。飛。瓊。淚。淡。秋。雨。遺。
翻。成。夢。只是。長。安。不。見。人。別。酒。花。底。笑。臉。柳。絲。輕。舞。粵。纖。腰。恍。疑。瓊。島。
興。同。攜手。好。月。那。堪。獨。上。樓。望。斷。鴛。鴦。猶。未。見。可。憐。蝶。翅。先。看。花。語。
花。落。春。歸。處。山。店。燈。殘。夢。到。時。好。夢。肯。隨。胡。蝶。去。離。魂。暗。逐。杜。鵑。飛。三。
春。景色。佳。期。誤。半夜。雨。聲。前。計。非。遠。砌。寒。風。荒。絡。緯。閉。門。疎。雨。落。梧。桐。
樓。客。漫。歌。金。縷。曲。住。人。猶。舞。越。羅。衣。紅。樹。樹。藏。殿。殿。浩。空。青山。空。遠。仲。宣。
樓。那。堪。往。事。空。空。落。誰。其。芳。樽。話。唱。酬。此。如。孰。夏。寒。仲。寬。所。集。也。如。山。
橫。改。國。三。年。別。江。岸。落。陽。九。派。分。兩。岸。蘆。花。飛。曉。雪。幾。家。松。火。隔。秋。雲。
迢。迢。露。野。雲。陰。合。浙。浙。珠。簾。雨。氣。通。風。月。無。情。人。暗。換。江。山。有。待。我。重。
來。九。重。霄。漢。天。將。近。萬。轉。雲。山。路。更。賒。武。帝。祠。前。雲。欲。散。胡。公。陵。上。日。
初。低。此。安。成。王。佩。所。集。也。如。碧。落。有。情。空。張。望。春。山。無。伴。獨。相。求。

山中習靜觀朝樹洞口經春長蔭蘿啼鳥歇時山寂寒寒鷓鴣飛盡水悠悠人生有酒須當醉世上浮名好是閒鎖樹重遮千里目故人那惜一行書此海鹽朱朴元素所集也如狀扉扉屋無人問斷崖寒流到底清歸鳥各尋芳樹去寒潮唯帶夕陽還花開花謝常如此船去船來自不停流水白雲常在晚山秋樹獨徘徊茶煙漁火遙如画江上雲山香莫窮此金華童珉廷瑞所集也如萬里悲秋長作客一官羈絆實藏身此崑山方鵬時舉所集也如鱸魚正美不歸去瘦馬獨吟真可哀梁間燕子聞長歎樓上花枝笑獨眠勸君更盡一杯酒與爾同消萬古愁此蜀中安磐石所集也如霜彫碧樹作錦樹色過櫻桃更及草亭詩鍾鼎名垂宇宙元戎小隊出郊垓花爛熳開何益妙舞蓬蓬夜草未休鍾鼎山林各天性風流儒雅亦吾師已聞童子騎青竹喚取佳人舞繡筵休怪兒童延俗客不勞鐘鼓報新時病軀動竟藜牀坐嬾性從來水竹居庚信羅含皆有宅李陵蘇武是吾師煙絲碧草萋萋長雨裏紅蕖冉冉香萬里相逢貪握手百年多病獨登臺此香山黃佐才伯所集也如歸信幾番夢逐夢愁心一倍長離憂自願勤勞甘百戰莫將成敗論三忽開西子面芙蓉不及美人妝徒勞掄淚傷紅粉但惜流塵暗洞房此劉芳節聖達所集也如世態炎涼隨節序人情翻覆似波瀾笛怨柳營煙漠漠馬嘶山店雨濛濛綠樹碧檐相抱映游絲舞蝶共徘徊人世幾回傷往事愁心一倍長離憂浮生已悟莊生夢未路虛彈貢禹冠敗葉殘蟬連漢苑古煙高木隔棉州五千里外三年客一寸心中萬斛愁返照入江翻石壁疎松隔水秦笙簧鳥下綠蕪秦苑夕雲凝碧樹看官秋此

明詩綜卷十

莆田陳言于庭所集也如念我能書數字至悲君已是如泉新添水檻供垂釣許坐層軒數散愁此廣州黎民表惟敬所集也如泉草夕陽江上路漁歌樵唱水邊邨一樽春醖蒲萄綠滿甕秋香竹葉青僧歸黃葉林邊寺人候夕陽江上舟此所集也如願我老非題柱客凡今誰是出羣雄因知貧病入須臾不露文章世已驚逐客雖皆萬里去雄豪復遣五陵知獨當省署開文苑未有涓埃答聖朝天子亦應厭奔走諸公何以咨昇平深山大澤龍蛇古木蒼藤日月昏此關中南師仲子興所集也如朝雲暮雨連天暗野草開花滿地愁蘭亭舊路陳子壯秋壽所集也如朝雲暮雨連天暗野草開花滿地愁蘭亭舊路雖曾識子夜新歌遂不傳自歎馬卿長帶病何曾宋玉解招魂追思往事咨嗟久始覺空門氣味長瑤臺絳節游俱遍粉黛紅妝畫不成碧落有情鷹帳望白雲何處更相期鸞鴦騰蹕啼空巷蟬曳殘聲過別枝大抵好花終易落爭教紅粉不成灰天長地久有時盡物在人亡無見期疎檐看織蠶蛸網古木惟多鳥雀聲去日已久未少他生未卜此生休珊瑚枕上千行淚白玉壺中一片水不堪紅葉青苔地早是傷春夢雨天更恨香魂不相遇真成薄命久尋恩碧莎裳下攜詩草楊柳州邊載酒船春蠶到死絲方盡古柏重生枝亦乾此秀水沈德符景倩所集也如孤檣夷猶期獨往崇山瘴癘不堪聞漫說簡書催物役可堪風景促流年津樓故市生荒草落日深山哭杜鵑幸與野人俱散誕不嫌門徑是漁樵此萊陽姜埰如農所集也如早春重引江湖興野性從來水竹居千樹桃花萬年藥半池秋水一房山側身天地更懷古獨立蒼茫白詠詩天下何曾有山水人間豈不是神仙王侯第宅皆新主富貴榮

華能幾時閒。尺書多歲月。韓萼落紙如雲煙。莫愁前路無知己。幾處
蠻家是主人。漢家城闕如天上。武帝旌旗在眼中。此意與周賈青士所
集也。如芳草有情能下淚。野花無語自生愁。關門令尹誰相識。江上漁
翁未易名。一曲正愁江上笛。十年如見夢中花。世人不知東方朔。谷口
空稱鄭子真。獨在異鄉為異客。自憐長病與長貧。那知白髮偏能長。莫
遣黃金漫作堆。為客馬卿真寂寞。依劉王粲本淒涼。坐中醉客延醒客。
鏡裏今年老去年。樹影悠悠花悄悄。江蘿漠漠荇田田。郎有女誰堪
託。伯道無兒最可憐。仙人有待乘黃鶴。壯士徒令感白虹。啼鳥歇時山
寂寂。寒鴉飛盡水悠悠。蒼蒼短髮還吹帽。共踏清歌又舉鄒。江上暮鷗
遙送影。湖南春草但相思。蒼山遠遞成千里。明月何曾是兩鄉。千里雲
山何處好。十年書劍總堪憐。波生野水鴈初落。風靜寒塘花正開。獨坐
黃昏誰是伴。每逢佳節倍思親。共說陳琳工奏記。焉知李廣不封侯。水
浮花片知仙路。草帶泥痕過鹿羣。晚景莫違窗外驥。銷憂已辨酒中蛇。
此蘭谿胡山天帥所集也。子叔父芾。蘭先生亦雅好集句。客至觴行恒
舉數聯。坐客服其工。綴子所記憶者。如細推物理須行樂。高視乾坤又
可愁。庾信羅含皆有宅。伏波橫海舊登壇。蕭何只解追尋信。賈誼何須
甲。屈平料得也應憐。宋玉不知何處弔。湘君能將心事成。閒事不簿今
人愛。古人豈有白衣來。剝啄便應黃髮老。漁樵閑中帝子今何在。河上
仙翁去不回。謝眺詩篇韓信劍。老萊衣濕戴頭家。笑拍霜管題詩句。聞
向春風倒酒餅。野廟向江春寂寂。殘燈無紙影幢幢。陸滕王高開臨江渚。
漢主離宮接露臺。鸚鵡須就陶彭澤。勳業終歸馬伏波。皆
極自然。陸務觀所云。火龍瀾。敵手。進補。器。官。家。衣。者。此。也。

明詩綜卷十

七

擬古 三首

岐路一尊酒。送君今遠行。交待未及竟。絲管激哀聲。冉
冉歲華暮。悠悠雲氣征。馳車戒往路。惻惻傷我情。我情
默已傷。歡愛不可忘。昔為春花妍。今為秋草芳。秋草芳
有時。夫君見無期。獨宿坐長夜。淚落如綆縻。白日儻回
照。孤懷君所知。

華月散高樹。列曜何參差。流光射結綺。綺思婦慘中。聞良
人涉遠道。感歎夜何其。清聲發妙曲。宛轉有餘哀。妙曲
固可聽。餘哀知為誰。春至桃李妍。歲暮華色衰。居然獨
處廓。顧影久徘徊。

離離谷中樹。燦燦春華芳。枝葉何盛茂。忽然隨風揚。流

光有彫換物理安可常擾擾路傷子哀歌使我傷杪秋
天氣肅白露結嚴霜攬衣不能寐起視夜何長明月出
東壁衆星羅縱橫歲暮鷓鴣鳴百草青自黃遠道者誰
子驅車登太行太行鬱嗟我天路無津梁興言念同志
涕下霑我裳

寄琪林黃道士

雨絕天景佳前榮樹光綠遙憐採芝侶遠在春山曲琴
歌久已斷酒賦何由續有約今夕同開樽埽茆屋

湖州樂

湖州溪水穿城郭傷水人家起樓閣春風垂柳綠軒窗
細雨飛花濕簾幕四月五月南風來當門處處芰荷開
吳姬畫舫小於斛蕩槳出城沿月回菰蒲浪深迷白紵
有時隔花聞笑語鯉魚風起燕飛斜菱歌聲入鴛鴦渚

白雲山

白雲山下春光早少年冶游風景好載酒秦陀避暑宮
躡青劉鋹呼鑿道木棉花落鷓鴣啼朝漢臺前日未西
歌罷美人簪茉莉飲闌穉子唱銅鞮華往似東流水
昔時少年今老矣荔子楊梅幾度紅柴門寂寂秋風裏

送何都閩濟南省親至京還廣

伊昔關河事征戰君家嚴君擁方面君拜元戎領大藩
虎旗耀日光於電北山之北南河南鯨波虎壘相巉巖
轅門上日開將聞白馬朱纓銀作銜軍中呼盧日向午

錦筵置酒夜擊鼓龍潭降卒解西歌翁源女兒學東語
有時俘賊珠海頭海門六月如九秋牙旗揮天虎豹怒
霹靂迸火魚龍愁銀漢淋漓洗穹昊嚴親入覲承恩早
角巾還第誰最高君與君家兄弟好竭來寧親東入齊
歸舟一繫蔣林西鶯花爛熳春如海歌舞流連醉似泥
蟾溪高彬故部曲開宴斗門橋下屋宣州梨子鵝兒黃
吳姬指纖白如玉酒酣耳熱悲故鄉孫蕢在座情更傷
關河北去五千里目斷南天如許長秦淮水生風似雨
十幅蒲帆醉中舉龍灣江口辭故入小孤洲北失前侶
知君第宅遠西湖門對羅浮列畫圖梅花白白想猶昨
盧橘青青今有無三郎今年三十幾平生與蕢最知己

明詩綜卷十

九

明歲春還若寄書玉堂華館西清裏

往平原別高彬

銀壺綠酒霑春宴環佩朝回奉天殿平生不作兒女悲
獨向高彬淚如霰高彬昔年桑梓雄好賢乃有古人風
東林詩社靜來結北海酒樽長不空竭來弓劍已蕭索
短髮如絲猶好客塞上葡萄火齊紅宣州梨子鵝兒白
沈繇不獨重相知文采今還勝昔時小樓焚香每讀易
淨几把筆常題詩今晨我作平原別高彬不意情欲絕
芙蓉香冷不堪贈楊柳枝黃未宜折龍灣江口石城頭
一幅蒲帆萬里秋暮雲紅樹儻相憶應有音書慰別愁

次歸州

歸州城門半天裏白雲晚向城下起市廛架屋依巖巒
婦女提罌汲江水巴山雪消江水長城中夜聞灘瀨響
客船樹杪鈎石稜漁父雲端曬罾網家家蕪田山下犁
倒枯大樹燒作坭居人養犬獲山鹿穉子縛柴園野雞
楚王臺高對赤甲四時猛氣長颶颶舵工鳴板避漩渦
櫓聲搖上黃牛峽

發忠州

顛風翻山雲黑黑星河無光江翕翕搖船夜半發忠州
漩深浪緊船欲立宣公祠下灘嘈嘈船頭著水低復高
石稜割裂箕斗影山鬼出雜魚龍號亦知風水莽回互
王事有程那得顧誰歌太白蜀道難和我靈均遠遊賦

明詩綜卷十

十

下瞿塘

我從前月來西州錦官城下十日留回船正值九九節
巫山巫峽風颼颼人言灑灑大於馬瞿塘此時不可下
公家王事有程期敢憚微軀作人鮮人鮮甕頭翻白波
怒流觸石為漩渦舵工敲板助船客破浪一撇如飛梭
灘聲櫓聲歷亂聒緊搖手滑櫓易脫沿洄劃轉如漩風
半側船頭水花沒船頭半沒船尾高水花作雨飛鬚毛
爭牽百丈上崖谷舟子快捷如猿猴攏船把酒聊自勞
因笑輕生博奇好吟詩未解追謫仙天遣經行蜀中道
巴東東下想安流便指歸州向峽州船到岳陽應漸穩
洞庭霜降水如油

題蘇名遠畫竹圖

蘇郎寫竹如寫帖珊瑚爲枝篆籀葉寒梢不及三尺長
遠勢直與青冥接青冥不辨西與東雲光竹色俱空濛
飛廉排山振鸞鷲霹靂迸火驚蛟龍奇搜不獨竹色老
竹傍有石仍更好想其落筆當酒酣人間屏幃愁絕倒
近時吳興趙子昂最能寫竹窮青蒼蘇郎晚出繼芳躅
湖海二妙相輝光十年不到瀟湘浦環佩空懷玉蕭女
相期共泛書畫船濃墨淒迷埽煙雨

送翰林典籍張敏行之官西上

燉煌城下沙如雪燉煌城頭無六月關西勁卒築防秋
捷書夜半飛龍樓九重下詔徵貔虎推轂上將開都府

明詩綜卷十

十一

黃旗卷日大軍行旄頭化石夜有聲燉煌迢迢五千里
十月卽渡黃河水上將翩翩才且雄平戎不數貳師功
叱咤猶在輪臺北匹馬已入渠黎國左較偏裨晚射鵰
倚鞍醉索單于朝西山黑風吹隨瓦霜角吹秋一作鳴塞垣
下太平今見遠宣威君往從戎幾日歸幕下文儒兼解

武詞林從此有光輝

周青士云
嘉州遺韻

武昌別魯侍儀舍人文濬

嘖嘖復嘖嘖人生交契真罕得我居翰苑君儀曹幾載
相聞不相識君名早已播南衢出入金門早奏書不謂
同乘建業水還來共食武昌魚武昌魚肥春酒好竟日
流連得傾倒黃鶴樓頭葉亂飛金沙洲上秋將老狂歌

謹浪清致同看君更有古人風才如關西楊伯起氣性一作

似城東陳孟公相親未幾還分手可憐新知樂未久君

隨征鴈入巴陵我挂雲帆沂川口歸州一作云去各悽然今

夕星河共一作一天秋晚還期來促膝與君同賦遠游篇

冬至

冬至至日日初長久客客懷懷故鄉梅蕊惟愁雪爛熳
柳條又是春相將嬾朝違世真自笑憶遠寄書人未央
海門關外暮雲合應有南還征鴈翔

秋風

秋風浙浙吹江亭汴河之柳猶青青黃姑東渡會七夕
白帝西來朝百靈初開琪樹已云落遠別客愁今未醒

明詩綜卷十

十一

欲寫鄉書寄南鴈故園萬里天冥冥

懷四川

草堂煙樹入青霄漢殿荒臺秀黍苗宇宙大一作名今尚

在風雲霸氣未全銷寒星夜落支機石錦水春明駟馬

橋花柳舊游今幾載西風蓬鬢影蕭蕭

龍江夜泊

蔣山山頭秋月明龍江江上暮潮生行人又是金陵客
卧聽西風鼓角聲

寄王彥舉

綠楊陰下玉驄嘶絲絡銀餅帶酒攜夢入南園聽夜雨

不知身在蔣陵西

出蜀

白帝秋高木葉黃蜀中長是雨浪浪瞿塘水落漩渦小
一路看山到兵

王佐

五首

佐字彥舉家本河東元末侍父宦南雄遂占籍

南海洪武初徵至京師授給事中有聽雨軒瀛

洲二集

黃才伯云彥舉才思雄渾體裁甚工 趙懷琛云 彥舉古風歌行伯仲高本律詩絕句方駕虞魏

詩話彥舉與孫仲衍結社南園開抗風軒以延嶺表名士及為給事 孝陵賜宋學士黃馬帝為作歌命詞臣和彥舉有臣騎黃馬當赤心 之句賜鈔一錠然其詩遠不及仲衍而當時之論云構 辭敏捷王不如孫句意沈著孫不如王不可謂定評也

唐仙方伎圖

開元天子承平日錦繡山河壯京室金殿璇題表集賢

明詩綜卷十

三

玉屏粉繪圖無逸夔龍接武居阿衡萬方旭日當文明

衡山仙人

一作老仙

何所有亦復通籍承恩榮縞衣黃

一作白

髮醜

顏老自說時來致身早綵篋初開玉仗分白驃突出銀

鞍小榻前製號賜通玄始信人間別有天樓船未遣蕊

珠賜歲籛俄更天寶年九齡歸卧曲江上牛郎又入中

書相花雨香飄蘭若鐘柳雲春拂

一作撲

金雞帳萬幾日少

樂事多梨一法譜聲相和鬪雞舞馬看不足不獨仙人

呈白驃仙人豈是呈仙伎畫者傳之有深意延秋門外

羽書飛却駕青驃向西避青驃劔閣雨淋鈴長路

一作一段間

心尚不勝不道画圖今若此碧雲芳樹滿昭陵

醉夢軒為錢公鉉賦

東吳高士索賦醉夢詩我亦醉夢無醒時問君醉夢緣
何事君言不解其中意但知痛飲復高眠即此悠悠是
生計乾坤偃仰如蘧廬心寓鴻荒大古初人皆掉舌譚
臧否君方默坐糟丘底人皆明目辨妍媸君獨黑甜渾
不知君不見汨羅江邊人獨醒捐軀徒博千載名人生
適意此為樂何須苦覓揚州鶴竹葉杯中閱四時蘆花
被底舒雙腳錢公錢公真吾師平生此意君得之我生
付與邯鄲枕行行無何有之鄉麒麟作脯瓊為漿借得
仙人笙與鶴一清八極同翱翔

憶舍弟彥常

明詩綜卷十

十四

庭草秋仍綠江楓晚漸稀年光隨水去功業與心違遠
海猶傳箭殊方未授衣翩翩南去鴈故作一行飛

書所見感舊

小小銀箏壓坐偏曾將古調寄新絃芙蓉綠水秋將老
鸚鵡金籠語可憐兩鬢秋霜明鏡裏十年春夢夜燈前
湖山隱約人何在空負當年罨畫船

美人紅葉圖

謝家夫人詠柳如黃陵女兒歌竹枝誰信長門秋色澹
西風黃葉斷腸詞

黃

括十首

哲字庸之番禺人明初用薦拜翰林待制侍太

子讀書尋兼翰林典籤出知東阿縣升東平府
通判尋坐法死有雪篷集

詩話嶺南無雪惟揚州宅僅一見之杜子美詩所云南雪不到地也唐
之度嶺而北倚篷聽雪註曰天下奇音莫是過矣歸樵軒名聽雪蓬
鄉里遂稱為雪篷先生其五言詩源本六代
七言亦具體品當在仲衍之下步舉之上

自君之出矣

自君之出矣無處託鱗音思君如晝燭淚盡不明心

過梁昭明太子墓

帝子降南浦飄飄蒼桂陰神飈迴震闕玄跡闕坤岑鳳
陵輝璞蘊龍沼燿珠沈文藻絢華黻芳芬揚素襟遺編
軼正雅曠代馳徽音玉馬風雲變金鳧歲月深霜蘭秋
被坂煙蘿夕翳林采蘋思永薦捐玦遂幽尋靈脩忽爾

明詩綜卷十

十五

逝歲晏勞子心遼東鶴馭遠緱嶺鸞笙吟眇眇因懷昔
營營徒慨今瑤華竟衰歇惆悵雍門琴

黃才伯云混選
詩中不可甲乙

東平謁堯祠

初政禮羣秩晨趨鄆陰郭稽古詢道源放勳久徂落齊
宮委華枕黼宸銷丹堊庭榛雉雉升裳蘇宗彞剝惟馨
思可薦廢墜予猶忤緬言垂衣時東狩玆方岳儀像儼
欽明聲容被緜邈茆茨遵曩儉階堦莫傳舊朔遺澤紛在
斯今皇仰先覺亦播康衢謠紹爾雍熙樂

秋夜雜興呈涂典籤穎

璿杓運西宇華月麗中楹坐知流序易遙夜秋風生銀
漢呈霄景金堂含夕清柔條棲湛露嘉蕙茁幽莖撫迹

遂成感如何君遠征相思雲陽浦名堯限玉京寸心渺
何極搖蕩如懸旌

舟次靈洲候廣雄飛使回不至

湛露晨未晞秋華被原隰征塗夙已戒承命履遐邑桂
水寒悠悠揚帆望不及川鱗想同泳羈羽尚云戢維楫
垂素期臨流重於邑睠然桀溺耦詎灑楊朱泣惆悵芳
菲情日暮空佇立

與伯貞或華二友會

二妙聯英標睠言顧榛莽良晤諧宿心玄談慰幽愴江
薜澹新綠谷鶯聞遠響感此離索情浩蕩煙霞想夷白
抗浮雲臨清延素賞何因繼芳躅一丘同偃仰

明詩綜卷十

六

餞區伯寬領歸善邑教

橫塘俟秋色芳藻颺已變渺渺波上舟忽如翔風燕琴
觴激幽思籩豆徒有踐所念同襟者飄飄各鄉縣章縫
協冲素况復斯文彥此邦多奇勝名山蔚蔥蒨暄壑棲
雲霞寒松閱霜霰爾行問津處沮溺因可見

贈劉仁仲昆季還浙東

沈憂自多緒復此送歸人昨夜淮南雨不知芳樹春竭
來持別酒相與慰茲晨日暮行艫渺東南瀾越津

扶溪春望

溪頭望春春色深美人不見勞予心綠波渺渺向南浦
晷畫樓臺芳樹陰天涯滿目丹青障春日春花兩搖漾

翡翠蘭苕不可思，鴛鴦桂樹長相望。相望相思雲路遙，
金塘流水亂春潮。採菱風急桂舟晚，疑是當年揚子橋。
橋邊楊柳青青好，惆悵春心被花惱。浦口迴船欲訪君，
相思一夜蘼蕪老。

游洪範池與劉文正

洞門斜日照金潭，千尺藤蘿挂石龕。騎馬獨來高處望，
滿山松柏似江南。

李

德五首

德字仲修，番禺人。洪武中用薦授雒陽長史，遷
濟南府經歷。調西安，改漢陽教諭。陞義寧知縣，
有易菴集。

明詩綜卷十

十七

詩話長史好效長吉，孫仲衍戲之曰：子誠
混元皇帝孫也。然其詩實與長吉相遠。

送友回真定

君自邯鄲來，復向邯鄲去。邯鄲月色好，夜照江南樹。太
行多峻坂，中有羊腸路。往來不憚煩，知君為親故。

棲雲菴

石室凝紫煙，空洞懸石乳。陰崖含風泉，終日灑飛雨。臨
流結精舍，六月不知暑。道人養清虛，適與高僧處。垢淨
俱已忘，孰為舍與取。諸幻既遠離，白雲日相與。何當謝
時人，來作塵外侶。

種麻

種麻滿東園，種花亦盈畝。麻生但芄芄，花發映戶牖。容

華能幾時零落他人手豈如爲締綌與君同永久向來
灼灼姿于今復何有

立秋日登漢陽朝宗樓懷鄉中諸友

湖山興不淺而我亦淹留得罪緣微祿懷君屬早秋澹
雲鄉樹遠孤月旅情幽借問衡陽鴈何時到廣州

金陵逢趙汪中

十年長契闊萬里各分飛岐路風煙杳江湖消息稀加
餐俱努力訪舊各霑衣春草無勞綠王孫自不歸

趙介二首

介字伯貞番禺人屢薦辭免坐累逮至京道南

昌卒于舟中後以子純貴贈監察御史有臨清

明詩綜卷十

八

集

陳廷器云臨清出入漢魏盛唐諸大家閩奧而充究心三百篇之旨以故所作出于情性止乎禮義讀之有關世教非若世之餽采色調聲響者所能及也

詩話伯貞絕意仕進植雙松於庭榜曰臨清蓋以淵明自擬也屢往還西樵山中有索題詩者去不顧其集雖不傳然名在五先生之列乃刊詩者去伯貞而冠汪忠勤於卷首可爲失笑也

聽雨

池草不成夢春眠聽雨聲吳蠶朝食葉漢馬夕歸營花
徑紅應滿溪橋綠漸平南園多酒伴有約候新晴

瑤池

宴罷瑤池暮雨紅碧桃花落幾番風重來八駿無消息
擬逐青鸞入漢宮

林鴻十六首

鴻字子羽清人洪武初以薦授將樂訓導久之拜禮部員外與高棟陳亮等同時稱閩中十

子有膳部臺

劉子高云子羽詩已窺陳捨遺之奧大有唐開元之風 李賓之云子羽詩專學唐人極力摹擬不

但字面句法并其題亦效之開卷驟視宛如著本然細味之求其流出肺腑卓然有力者指不能一再屈也 徐子元云子羽師法盛唐唐臨

晉帖殆逼真矣惜惟得其貌耳 穆敬甫云員外自負良高晚與浦舍人結社愈詣妙境兩人皆詩家俊豪也 胡元瑞云員外諸體皆工

五言律尤勝買唐錢劉問不復辨別七言如珠林員外才情藻麗如游魚流帶宛瀟氣色高華風骨道爽 顧玄言云林員外才情藻麗如游魚

潛水翔鷲薄天高下各適情性 蔣仲舒云子羽命才充裕標格華秀雖以隄柳宮花之句得名他作實多賦者 閩人言詩者皆

本鴻黃玄周玄林敏陳仲宏鄭關林伯璣張友謙趙迪悉鴻之弟子其詩派禰三唐而祧宋元摹其氣象按其音節庶幾似之其所以不及唐

人者正其摹仿形似而不知由悟以入也 李衍章云子羽如出林新鶻羽翻初成 宋韓文云明初閩中詩人子羽為冠王余州呵為小乘

要亦是 作家

詩話閩中十子子羽稱巨擘焉而循行矩步無鷹揚虎視之姿此猶翡翠蘭若方塘曲渚非不美觀未足與量江海之大

明詩綜卷十

感秋

撫劒中夜起氣候何淒清天高白露下北斗當前極嗷嗷雙飛鴻隨陽亦宵征微禽爾何知寒暑嬰其情始知玩物化中復念吾生三十志有立一經尚無成緬懷古哲人信與大運并道在無終始時來暫衰榮感歎不能寐延首東方明

飲酒

儒生好奇古出口談唐虞儻生羲皇前所談乃何如古人既已死古道存遺書一語不能踐萬卷徒空虛我願但飲酒不復知有餘君看醉鄉人乃在天地初

金雞巖僧室

遠公青蓮宇百尺構雲闕一徑入松蘿山泉濯苔髮石
房彈玉琴清響在林樾夜來滄海寒夢遶波上月微吟
白雲篇高興了未輟未能悟聲聞安得離言說

沈山子云頗似王龍標

遊芙蓉峰

密竹不知路渡溪微有蹤懸知石上約定向松間逢物
候變黃鳥萑蒲花蒙茸相望不可即裊裊霜天鐘

經東山別墅

別墅在東山經過感疇昔縱橫醉時墨猶在池上石林
氣颯以涼山容澹將夕緬懷攜手人念念不能釋

精巖寺

香刹象天界名僧辭世氣一峰獨凌削衆壑相氤氳作

明詩綜卷十

三

禮向金仙宴林投鶴羣山犬銜人衣却走避腥葷於時
春向暮林亭藹餘曛蒼然草木氣盡濕西江雲登閣見
千里眇懷滄海濱山鐘忽播蕩應此悟音聞

送吳士顯

吳生跌宕人脫略當世事欲識平生心悠悠江海是布
衣何飄飄孤劔千里至斗酒未及歡看雲起歸思長風
吹古城寒日下秋水分手從此辭車塵望中起

齋中曉起

颺颺城鴉散蓼蓼戍鼓絕空庭寂無人衣上有殘月爽
氣山前來吾襟抱冰雪

秋夜憶周模

傾蓋一分手沈思長在襟况茲離居夕復此秋城砧露
下葉初落草根蟲又吟雖云感物候終念曠幽尋劒水
東南流故人千里心無因達尺素夢遶青楓林

江閣秋雲圖

山容初斂夕雲氣已歸壑何以散沖襟孤琴坐江閣美
人期不來天寒楓葉落

賦得獨樹邊淮送人之京

君不見秦淮水流東到海淮邊獨樹如車蓋九月微霜
赤葉乾枯枝颯颯鳴天籟枝上啼鴉散曙煙枝頭殘照
咽寒蟬離人留飲停車騎俠客相逢挂馬鞭南國高僧
從此去駐錫雨花臺下路一飯淮邊洗盃時六時晏坐
祇園樹野鶴孤雲任往還禪心不道別離難山中亦有
長松樹待爾青青共歲寒

經綺岫故宮

行人曉飯青山裏驅馬蒼茫經洛水昔聞綺岫盛繁華
不謂荒涼今若此憶昔行宮初構時梯巖架壑相逶迤
美人桂殿夜看月公子拓弓朝射麋翠華一去金門鎖
露電飛螢山葉隨往事吹殘牧笛風危基半入樵人火
今古消沈能幾回春風依舊野花開君王巡狩不復見
禾黍空山鳥雀哀

巫峽啼猿歌送丘少府歸四明

巫山巫峽連三巴猿啼三聲客思家停舟聽之聲未了

却過青枝猶裊裊野人乍來錦官城清秋滄峽啼猿聲
黃牛灘下怨楓落白帝祠前哀月明商聲清冽羽聲亂
倏忽東崖復西澗久客聞之淚欲乾壯夫聽此魂亦斷
故人歸卧越山雲憶得啼猿歌送君扁舟獨宿剡溪夜
叫月三聲誰共聞

送高郎中使北

漢使臨邊日天驕已請和看花辭紫陌犯雪渡交河水
草留行帳雲沙想玉珂誰知清漠北婁敬策居多

鍾廣漢云絕似

元郎士

留別蔡秀才原

別離無遠近暫去亦傷神正是千山雪誰悲獨往人江

明詩綜卷十

三

空螺女夜花暗冶城春不見同游侶酣歌淚滿巾

憶龍門高逸人

浮亭露飲玉樽空千里心期此夕同海路想經春草綠
越吟愁對夜燈紅他山花發鶯啼後別墅春歸積雨中
聖代祇今無隱逸不應多病卧孤蓬

陳亮 二首

亮字景明福州長樂人明初累詔不出有儲玉

齋集

李時遠云亮詩
冲澹有陶韋風

夜泊古崎

寒山夜蒼蒼清猿數聲響風生蘆葦鳴水落洲渚廣月
落知潮來時聞人蕩槳

秋暮懷劉宗魯

海國別來久長懷瓊樹枝閒齋坐幽獨悵望秋風時自
非物外人邈焉難與期空傷綠華歇坐惜白日馳對酒
更愁予勞歌空爾思

唐泰一首

泰字亨仲福州閩縣人洪武甲戌進士授行人
終陝西副使有善鳴集

江上書懷寄周大林大

昔年曾共醉蘭舟明月閒情憶舊遊獨客荒邨空向暮
異鄉多病畏逢秋殘煙野戍聞寒笛落日楓林見驛樓
為報別來憔悴甚漫因尊酒一消憂

明詩歸卷十

三

鄭定一首

定字孟宣福州閩縣人陳友定辟為記室友定
敗浮海亡文廣間久之還居長樂洪武中徵授
延平訓導歷齊府紀善終國子助教有澹齋集

伏波祠懷古

荒祠衰草已淒然猶有居人話昔年銅鼓苔生秋雨後
石牆花落夕陽邊竹書早著平蠻策沙井空餘飲馬泉
詞客經過休感慨雲臺麟閣總寒煙

王褒一首

褒字中美閩縣人洪武癸酉舉人官至王府紀

善有養靜集

題秋林泉石圖

高林頗深遠，遠洲亦繁紆。風景亦何異，中有隱者廬。陽崖落日明，陰澗浮雲虛。耕野見秋火，扣舷聞夜漁。竭來塵網中，機務日相拘。念茲膏肓疾，媿彼泉石圖。抱拙謝簪黻，養素宜琴書。俯仰天宇寬，所樂恒有餘。

高棟八首

棟宇彥恢，任籍名廷。禮長樂人，永樂初以布衣召入翰林，為待詔久之。陞典籍，卒於官。有木天

清氣，嘯臺二集。

林尚默云：詩始漢魏，至唐極盛，宋失之，理趣元滯於學識，而不知由悟以入。自襄城楊士弘始

編唐音，然知者尚鮮。先生選唐詩，品類議有服其精博。平生賦詠流傳海內，又能書工，回時稱絕。俞汝成云：漫士意興俱佳，而歌行尤勝。

顧玄言云：翰籍才識博，道惜文多，意少且之。新興至擬古，諸作頗擅。雕蟲往往有青於藍者。李時遠云：廷禮深得唐人風致。

明詩綜卷十

十四

漫士嘯臺集，其山居擬唐之作，首節可觀。神理未足，時出俊語，錚錚自賞。木天集應酬冗長，塵空堆積，不足與宋元人作僕。何況三唐。李舒

善手，頗有尺度。

詩記：廷禮擬唐如薛稷鍾紹京之雙鉤，終下真蹟一等。五古若長空一飛，鴈落日千里，至夜色不映水，微風忽吹裳，銜杯雙樹間，百里見海色。

飛雨一峰來，微雲度。疎竹不失唐人畫。俱

九月八日郭南山亭宴集分得下字

海國霜氣涼，秋聲落遙野。乾坤肅以清，收納屬多暇。出郭尋幽期，同人命軒駕。載酒入翠微，憑高憩層榭。蒼山橫黃雲，大江天同瀉。飛雨霞際晴，夕陽鴈邊下。江山滿

陳迹，今古成代謝。高興殊未平，臨風獨悲咤。

同羣公餞鄭五秀才至鼓山寺分題贈別賦得臨

滄亭

芳薈海上秀，峰開禪宮飛。亭挂空翠直，上臨方蓬溟。
漲在几席天，光映簾櫳目。極萬里外，但見青濛濛。曙色
從東來，晃然霧境空。登臨豈不偉，別意歎無窮。

賦得羅浮霜月懷二逸人

海國梅始白，飛霜動鳴鐘。寒空一片月，挂在羅浮峰。夜
色不映水，清光與之同。百里皆瑤華，千林闕幽風。蕭條
巖際葉，嘹唳雲邊鴻。遠空起遙念，滄波思千重。夢迴明
鏡沒，寂歷聞幽蛩。

題邑生陳溢鍾山草堂

鍾山抱藍田，水木含清氣。愛爾靜者居，草堂在山翠。簾
櫳映竹開，几席侵花置。野客載酒過，山僧抱琴至。陶然

明詩錄卷十

十五

接歡賞邈爾，成幽契。月出海空雲，生石門。閉岱溪樵
唱，來沙頭。松聲細，佳趣足。淹留遠心更迢遞，維時屬休
明。巖穴無遺棄，終南登捷徑。北山裂荷製，予亦問山靈。
斯人果忘世。

賦得燈前細雨贈別鄭浮丘

野館昏色來，明燈靜深塢。故人惜睽違，共此尊前雨。斜
影明遠心，夜深帶離苦。飄蕭初拂席，颯沓仍近戶。重
溼餘芳宿，雲暗平楚明。發送君行淒淒滿，南浦

水竹居

清溪入雲木，隱處林塘深。微月到流水，冷竹間清音。
聲起遙聽天，影激遠心余。亦鸞鶴侶，將期此投簪。

酬林一和閒齋見懷之作

東山遙夜鴈歸聲兩地相思舊感生芳草白雲
春風黃鳥若為情雙日下鷗波靜獨樹原頭獵

誰道離居成寂寞好文地主久知名

擬蘇許公頊侍宴安樂公主新宅應制

飛構雲邊帝子家宸遊天上駐仙車玉杯春醉平陽館
銀漢秋行博望查萬樹春花近日吐千條弱柳向風斜
皇情愛物懽無尤能使羣心戀翠華

蔣仲舒云運斤成風信堪
膾炙胡元瑞云諸詩殊

有唐風國初藝

元此調字糊

王 傅 七首

傅字孟揚其先東阿人從父翰宦流寓閩中洪

明詩綜卷十

三六

武庚午舉人永樂初用薦授國史院簡討命參

英國公張輔軍事坐黨下獄死有虛舟集

解大紳云孟揚

詩欲交駕盛唐

徐子元云孟揚凌駕漢唐見推解子東南天柱馬用

洪達顏方信云孟揚典雅清拔純有天寶俊聲

蔣仲舒云虛舟詩

句從新等材自故來

穆敬甫云王詩從容典麗得

風人體裁老

車始云孟揚詩本李白矯矯不羈

詩話孟揚才名與解子神相伍其獲罪亦同然詩格

華整遠勝學士聞當日有詩是可惜無從見之

車遙遙

車輪何遙遙西上長安道不見車上人空悲道傍草君

行日已遠恩愛難自保憂來當何如一夕夢顛倒豈無

中山酒一浣我懷抱但恐三春華顏色不再好車聲何

鄰鄰風吹馬蹄塵願隨馬蹄塵飛逐君車輪

短歌行

東風吹花隨錦筵綠楊搖蕩青樓煙主人自為鸚鵡舞
小伎更奏鴛鴦絃當杯入手君未醉落日已在西山巔
短歌一曲心茫然請看明鏡高堂上何須白髮悲芳年
入西山訪張隱士

兩崖噴飛瀑結屋煙蘿裏山人不冠履客至同隱几獨
鶴海上歸孤雲澗中起淨埽白石牀風來墮松子

邕州

五管推名郡雙江共上游人家蠻霧曉山雨瘴煙秋遠
客誰青眼殊方易白頭今宵南極外分野望牽牛
楊秀才幽居

楊子幽居處閒窗面遠空水喧明鏡裏雲落畫屏中卷

明詩錄卷十

三

幔留山月揮絃送晚鴻何人問奇字載酒野橋東

宿巴陵聞笛

玉笛飄殘月下聲空江秋入思冥冥怪來楊柳移關塞
可是梅花落河庭半夜旅魂隨調切誰家少婦倚樓聽
曉來更覓龍吟處一點石山水面清

左江錄似友人

左江江水日潺潺鳥語莎裳住百蠻莫道天涯應在此
交州更隔萬重山

王恭十九首

恭字安中自稱皆山樵者閩縣人永樂初以儒
士薦起待詔翰林與脩大典授翰林典籍投牒

歸有白雲樵唱鳳臺清嘯草澤狂歌

顧玄言云安中思多懷怨詩喻

頗深 穆敬甫云王詩工而有調乃潛心風雅者 林德者云皆山善得中唐之韻如渭水寒流秦寒晚瀟陵殘雨漢原秋他鄉見月長為客別路逢霜半在船鳥外明河秋一葉天涯涼月夜千峰雲歸獨樹天邊小雪罷孤峰鳥外青驛館夜殘明候火市樓霜曉度寒砧樓閣葉上驚新雨砧杵聲中憶故園幾處移家鷺落葉十年歸不到十歲既收苑長洲樹鐘度寒山半夜船帆飛楚水舟中飯夢鏡淮山樹裏行均有大

曆十子

遺音

詩話袁景文以白燕詩得名然如月明湘水初無影雪滿梁園尚未歸翻不若琴川時大本之珠簾十二中間卷玉剪一雙高下飛也顧光遠以白鴈詩得名然如錦瑟詩 柱玉關曉度雪侵衣亦不若王安中之夜雨蘆花看不盡 陽楓樹見初飛也安中整練不及于羽而風華跌宕多纏綿之音固勝之

去婦詞

刺促何刺促東家迎昏西家哭哭聲休使東家聞東家車馬方如雲滿堂笑語看珠翠夾道風傳蘭麝熏浮雲

明詩綜卷十

三

上天花落樹君心一失無回悟明知遣妾何所歸飲淚行尋出門路青銅鏡面無光采妾心尚在容華改東家新婦傾城妾似妾從前初嫁時

舟次鐔潭

木落川氣涼鴻飛水容微燈射遠沙夜榜鄰幽石月色棲處寒霜花坐來白遙見九華峰蒼蒼但蘿薜

初秋同叔菽彥時遊崇山蘭若

習靜厭紛擾幽尋給孤園翛然香林下似得桃花源一鳥落天鏡千花秀禪門紛吾道機淺謬接甘露言月色隱秋思荷香清夜魂終希偶緇錫永矣超塵喧

雞公籠

荒岡古墓雞籠邊
蔓草離離生野煙
狐狸養子隱荆棘
烏鳶作巢銜紙錢
石麟薶沈土花溼
月下精靈語還泣
此墳未必無子孫
浮榮一去不復存
誰家新冢高數尺
又買西家墳上石

感懷

不彈貢禹冠不結蕭朱綬
幾處移家任轉蓬
半生失路惟耽酒
兔園挾策竟徒勞
欲逐長沮學種田
秋風僅有相如壁
舊物空餘一畝種
異鄉淪落無朋友
論文昨日今何有
誤將偃蹇對時人
豈謂新知不忠厚
萬事蕭然一布衣
白頭夢想故山薇
抱琴欲奏猗蘭曲
目送雲天斷鴈飛

明詩餘卷十

元

聞笛歌送人之塞上

橫笛對誰亭扁舟越江口
月下何人最斷腸
天涯怨別驚楊柳
此之愁心獨對君
明朝悵別又離羣
單于城上吹羌管
知爾相思不忍聞

題扇

山蒼蒼兮白雲谷
宵宵子夕氛鴻高飛子遠逝
蟬薄暮兮空聞泛木蘭
兮容與隱薜荔兮氤氳紛吾老兮既拙
誓相從兮夫君

書江山別意圖送羽人還神樂觀

羽人何處去歸事玉宸君
飛珮花間別橫簫鶴上聞
過關闌樹斷挂席楚江分
想到齋宮夕圓丘候五雲

江樓聞笛

纖月挂風林晴樓覆夕陰誰家吹鳳管
永夜作龍吟楊柳邊頭恨梅花笛裏心
天明漢江上惟見水雲深

寄滄洲狂客

三年憔悴得君憐君上青雲益惘然
客裏思鄉何日到天涯見月幾回圓
未期歲晚同攜手預恐新正對別筵
貧賤獨慙無可贈臨歧三憶緩朝鞭

鷓鴣

綠樹殘春啼雙飛錦翼齊長沙有遷客
莫向雨中啼

題水墨小景

白鷗門外孤艇黃葉山中一瓢惆悵
青雲舊侶相思不

到漁樵

詠天風

青蘋江上細首蕭蕭吹得林間萬葉飄
何處淒涼最關別數株殘柳灞陵喬

邨居

草徑茆扉帶軟沙隔林雞犬幾人家
青山盡日垂簾坐落盡椽櫓一樹花

春鴈

春風一夜到衡陽楚水燕山萬里長
莫怪春來便歸去江南雖好是他鄉

老馬

百戰沙場老此身長楸宮草幾回春只今棄擲寒郊路
猶自悲鳴戀主人

山樓對酒

樓前積水映蒼苔卷幔孤雲落酒杯更盡一樽秋雨外
故山曾有幾人回

月下聞箏

愁心不見薛瓊瓊何處
一絃一柱總聞作

二馬圖

紫騮嘶逐玉花驄曾是沙場百戰功今日奚官重翦拂
落花芳草灞陵東

明詩錄卷十

三

黃 玄一首

玄字玄之侯官人官泉州訓導

詩評 予羽倡風雅於八閩從之游者頗衆而獨矜許二玄為入室弟子其詩 玄之詩云也風類悟十五始知文冥心三十年尋源頗知津探奇始自得服膺如獲珍迺將覺後生庶以酬先民青衿二十徒達者惟黃玄持山石者一 二玄乃其人然二子詩太狂弱句續字湊不能成家似非孟揚邊士皆 之伍南皮李氏稱二子詩託興悠遠列 八爾乙

河上立春

故國幾時別殊鄉今早春青陽開霽雪殘日送歸人漸
與雲霄隔空驚歲月新不堪零落處愁淚滿衣巾

周 玄一首

玄字微之閩縣人以文學徵為禮部郎中有宜

題青城圖

青城辭家仙路遙
秋後白雲還見招商山
老人不歸去
巖徑松扉長寂寥

明詩綜卷十

明詩綜卷十

三

